

明詩去浮上



施一山錄次

明
詘
去
淨

臨霞軒藏板

卮言十則

一樂府唐已失傳何論有明才華雖盛而音節未協不隸伶官終不得謂之樂府其間間有音節去古未遠者聊存一二李杜新樂府題譬則古詩又一論矣

一古詩或騷體或歌謠或三言四言五言六言或三五七雜言分類殊瑣茲合古體近體爲一凡一人之作卽彙集一人名下展卷了然豈不一快一人存一詩存兩三詩擷其片羽亦足概其大凡正不必以多爲尚

一洪武初功封徵授者無從考稽依世本錄制科後



鄉會一循科分庶先後有倫不至十分凌亂
一武職雜職國學文學高人隱士悉綴一朝之末不
另分部其詩

一身際兩朝者復出仕則歸其詩於所仕之朝
一詩有真有僞真者直抒性情僞者飾說以欺天下
後世又有專襲膚詞虛譽滿紙走謁當途希弋聲
利詩似是而實非不可不辨

一宮詞者各極一代之形容風人具有微旨

一竹枝詞陳風也韜軒繼起量所不遺

一釋道之詩學力薄閨閣之詩風骨靡神仙妖魅之
詩每多假托誕妄均無取焉

明詩之選不一家有過於繁蕪者有過於簡略者簡略
過則珠遺繁蕪過則莠亂二者等失將采風者奚自焉
茲錄也斟酌於繁簡之間或因人以存詩代不數人或
因詩以存人人不數詩豈必無遺亦聊冀其不亂耳顏
曰去浮此物此志也至第其後先者所以資論世系其
官爵子奪者所以感遭逢獨寐寤歌可羣可怨未必非
性情之事也若乃馳詩壇騁選席弋虛譽要無窮則已
之真先失又安在其去浮哉窹啓寡聞尚其迪予不逮
乙巳上元一山氏書於臨霞軒次時年八十

明詩去浮卷一目次

洪武

劉基 十七首

張以寧 二首

高啓 十五首

徐賁 六首

王佐 二首

沈貞 七首

冷謙 一首

管訥 七首

烏斯道 二首

汪廣洋 六首

陶凱 一首

楊基 八首

孫贊 五首

王偁 四首

錙鈔 一首

谷宏 一首

王蒙 三首

林子森 一首

胡奎 二首

袁華 一首

偶桓 四首

練高 一首

瞿佑 三首

平顯 一首

施敬 四首

練子寧 一首

黃子澄 一首

袁凱 七首

解縉 三首

建文

方孝孺 六首

楊士奇 三首

永樂

曾棨 五首

周述 二首

李時勉 三首

周忱 一首

李禎 四首

陳循 一首

薛瑄 四首

于謙 五首

劉球 一首

王恭 八首

正統

劉珏 三首

商輅 一首

陳獻章 四首

景泰

郭登 四首

王越 六首

張寧 六首

丘濬 二首

沈愚 五首

天順

李東陽 十一首

已上共五十人詩二百二首

明詩去浮卷二目次

成化

吳寬 三首

楊一清 三首

儲巵 三首

喬宇 一首

鄒智 一首

楊廉 三首

沈周 二首

史鑑 四首

趙同魯 一首

薛章憲 一首

朱朴 四首

弘治

吳一鵬 三首

李夢陽 二十七首

劉玉 一首

戴銑 一首

邊貢 五首

王九思 二首

顧璘 八首

唐寅 二首

王守仁 三首

康海 四首

何景明 二十首

朱衮 一首

王廷相 七首

顧應祥 一首

孟洋 二首

殷雲霄 二首

徐禎卿 十六首

鄭善夫 三首

正德

唐龍 五首

韓邦靖 三首

胡纘宗 一首

楊慎 七首

常倫 三首

頓銳 四首

蔣山卿 三首

薛蕙 十四首

舒芬 一首

夏言 六首

許宗魯 四首

陳沂 一首

王廷陳 九首

敖英 三首

文徵明 四首

已上共四十四人詩二百二首

明詩去浮卷三 目次

嘉靖

徐階 三首

張時徹 五首

顧夢圭 二首

高叔嗣 四首

蘇祐 三首

華察 四首

屠應峻 二首

王格 二首

羅洪先 三首

唐順之 五首

沈愷 一首

王之問 一首

尹耕 十首

黎民表 二首

許穀 一首

王維楨 一首

薛應旂 一首

施峻 三首

沈鍊 三首

陸樹聲 一首

王崇古 一首

瞿景淳 一首

朱曰藩 二首

李攀龍 三十九首

楊巍 六首

陸光祖 一首

楊繼盛 二首

王世貞 三十一首

張佳胤 四首

潘季馴 一首

梁有譽 一首

徐中行 二首

吳國倫 八首

李袞 四首

宗臣 三首

吳文華 一首

王世懋 一首

申時行 四首

沈玄華 一首

許國 一首

施愛 一首

戚繼光 二首

張元凱 十首

盧柟 六首

謝榛 五首

徐渭 三首

王穉登 二首

已上共四十七人詩二百首

明詩去浮卷四 目次

隆慶

于慎行 二首

王象春 一首

萬曆

游朴 一首

曾朝節 一首

屠隆 二首

湯顯祖 一首

孫廷燦 一首

王士昌 一首

鄧以讚 一首
馮時可 二首

馮夢楨 五首

馮琦 二首

朱國祚 一首

殷都 一首

劉黃裳 一首

徐燿 三首

陶望齡 一首

高攀龍 四首

郝敬 一首

區大相 二首

王在晉 一首

謝肇淛 一首

袁宏道 四首

江盈科 一首

曹學佺 四首

熊廷弼 一首

張以誠 一首

石九奏 三首

楊漣 一首

左光斗 一首

王象春 二首

繆昌期 一首

周順昌 二首

魏大中 一首

李應昇 一首

沈德符 四首

施邦曜 一首

吳稼登 一首

欽叔陽 三首

婁堅 二首

程嘉燧 二首

天啓

錢嘉徵 一首

文震孟 一首

倪元璐 一首

徐石麟 六首

祁彪佳 一首

黃道周 一首

李之椿 一首

熊開元 二首

侯峒曾 一首

朱鷺 二首

崇禎

楊廷樞 二首

姜埰 二首

馬世奇 二首

劉理順 一首

魚世奇

方以智 三首

姜垓 二首

朱一是 三首

徐枋 二首

黃淳耀 八首

吳易 三首

吳爾壩 三首

施武 八首

秦徵蘭 八首

周立勳 四首

趙士喆 十首

顧炎武 十一首

韓洽 一首

王翊 二首

董說 三首

方文 三首

已上共七十二人詩一百九十首

明詩去浮卷一

古吳 施何牧 錄次

青田劉基伯温

洪武初官至御史中丞論佐命功封誠意伯後為胡惟庸所毒

牆上難為趨行

弱水不可以航石林不可以車人生貴守分牆上難為趨茫茫八極內狹徑交通衢紛紛皆轍迹擾擾論錙銖焦原詫齊踵龍領夸探珠片言取卿相杯酒興剪屠機事一朝露妻子化為魚林間有一士蓬蒿翳窮廬種稻十數畝種桑八九株有酒且飲之無事即安居孰知五

鼎食聊保百年軀悠悠身後事汲汲復何如

走馬引

天冥冥雲濛濛當天白日中貫虹壯士拔劍出門去手
提仇頭擲草中擲草中血漉漉追兵夜至深谷伏精誠
感天天心哀太一乃遣天馬從天來揮霍雷電揚風埃
壯士呼天馬馳橫行白晝吏不敢窺戴天之恥自古有
必報天地亦與相扶持夫差徒能不忘而報越棲於會
稽又縱之始知壯士獨無媿魯莊何以為人為

長安道

長安道送盡芳菲到枯槁人生衰盛苦不常何異長安
道傍草漢家將軍初拜官門前上客車班班一朝勢衰
來如雲

玉階怨

長門燈下淚滴作玉階苔年年傍春雨一上苑牆來

長門怨

白露下玉除風清月如練坐看池上螢飛入昭陽殿

旅興

青青瀟湘竹漪漪被寒水遊子如飛蓬佳人曠千里登
高左右望但見黃塵起鳳皇翔不下梧桐化為枳傷懷
不可道憂念何時已

日落天氣涼逍遙步庭墀蟋蟀已在宇鴻鴈來何遲少

壯輕遠遊衰老傷別離念我親與友各在天一涯音容
兩契闊悲歡絕相知鍛羽懷舊林葺鱗思故池百年能
幾何逝者無還期俛仰增感歎有懷當語誰殷勤託宵
夢聊同慰所思

和石抹公

勾芒發陳根北斗轉東柄衆星各參差威弧何時正好
生雖聖心明刑亦王政哲人慎謀始斯焉獲終慶徒言
兩階舞可以懷逆命不見三危山萬里竄梟獍世德異
唐虞民情好爭競那無跗扁醫尚有膏肓病波濤地軸
顛虎豹天關夏雨露當春滋風霜及秋勁誰能奉明王
順天行號令

題釣渭圖

璇室羣酣夜璜溪獨釣時浮雲看富貴流水澹鬚眉偶
應非熊兆尊爲帝者師軒裳如固有千載起人思

過南旺時守閘不得行

客路三千里舟行二月餘壯顏隨日減衰鬢受風疎蔓
草須勾國浮雲少昊墟愁心如汶水蕩漾遶青徐

望孤山作

返照千山赤寒煙一島青羈心霜下草生態水中萍黃
屋迷襄野蒼梧隔洞庭空將垂老淚灑恨到滄溟

古戍

古戍連山火新城殷地笳九州猶虎豹四海未桑麻天

迴雲垂草江空雪覆沙野梅燒不盡時見兩三花
不寐

不寐月當戶起行風滿天山河青靄裏刁斗白雲邊避
世慙商綺匡時媿魯連徘徊懷往事惻愴感衰年

春興

深春積雨感年芳暮館輕寒透客裳翠柳條柔先改色
紫蘭花冷不飄香山中虎豹人煙少海上樓臺蜃氣長
燕子新來畏露濕一雙相對立空梁

贈西巖道元和尚

西巖寺裏雲巢子不到人間幾十年杖錫野猿迎路側
談經山鬼立燈前塵飛劫火青春夢雪滿長松白日眠

近得淵明入蓮社興來時復有詩篇

江行雜興 二首

馬當之山中江中其下乃是馮夷宮良宵月出江水底
行人喜值天無風

九龍山西西日沉江雲壓地生層陰汀洲無人蘆葉響
哮虎一聲風滿林

高郵汪廣洋朝宗

洪武初爲中書左丞封忠勤伯尋貶廣東詔數
其罪自縊

明發

膏車待明發逶迤上河梁親朋羅祖餞冠蓋燦成章條

風被原隰春日當載陽鳴鳥餘好音雜葩紛衆芳魴魚
始登薦旨酒屢充觴旣醉復瞋言欲去故傍徨維周仲
山甫王命慎所將夙夜無有懈庶幾終允臧斯言啓深
省勗哉何日忘

遠遊

朝發庾公樓夕叩滕王閣長歌奮激烈清風蕩寥廓張
帆江水秋伐鼓關月落予亦將遠遊明當造黃鶴

嶺南道中

過盡梅關路灘行喜順流滢江元到海橫石不容輶嶺
樹垂紅果汀沙聚白鷗從來交廣地還是古揚州

嶺南雜詠

牂牁流水碧潺潺潮落潮生草木間一片海雲吹不起
越人遙指是崖山

鴈翅城東湧怒濤外洋水長蜚船高莫言昨夜南風急
今日登盤有海蠔

晚過清河驛

溯流西望渺如煙黃帽齊將百尺牽日暮雨來風浪惡
隔河搗鼓換官船

古田張以寧志道

元末進士洪武初以薦起官至學士

峨眉亭

碧酒雙玉瓶獨酌峨眉亭不見李太白惟見三山青秋

色淮上來蒼然滿雲汀安得十五絃彈與蛟龍聽

送阮子敬南還

君家重峰下我家大溪頭君家門前水我家門前流我行久別家思念故鄉水况乃故鄉人相見六千里十年在揚州五年在京城不見故鄉人見君難為情見君情尚爾別君奈何許送君遽不堪憶君良獨苦君歸過江上為問水中魚別時魚尾赤別後今何如

天台陶凱中立

洪武初召修元史陞禮部尚書出為湖廣叅政致仕

長平戈頭歌

長安野人鑿地得古戈上有疑字歲久俱滅磨惜不能如豐城古劔射牛斗吁嗟戈乎奈爾何但見青銅凝寒暮煙紫月黑山深夜飛雨恨血千年猶未銷荒郊夜夜啼冤苦當年趙括輕秦人降卒秦坑化為土嗟哉趙亡秦亦亡落日長城自今古摩挲爾戈一問之令人為爾生愁思何不以爾為鍾鐻何不以爾為鼎彝吁嗟戈乎徒爾悲爾今還當太平世人間銷兵鑄農器願壽吾皇千萬年終古不用戈與鋌

長洲高啓季迪

洪武初召修元史擢戶部侍郎放還後坐法死

悲歌

卷一
征塗嶮巖人乏馬飢富老不如貧少美游不如惡歸浮
雲隨風零落四野仰天悲歌泣數行下

阿那瓌

牛羊草漫野大帳天山下十萬控弦兒聞箠齊上馬

塞下曲

日落五原塞蕭條亭堠空漢家討狂虜籍役滿山東去
年出飛狐今年出雲中得地不足耕殺人以為功登高
望衰草感歎意何窮

牧牛詞

爾牛角彎環我牛尾秃速共拈短笛與長鞭南隴東岡
去相逐日斜草遠牛行遲牛勞牛飢惟我知牛上唱歌

牛下坐夜歸還向牛邊卧長年牧牛百不憂但恐輸租
賣我牛

養蠶詞

東家西家罷來往晴日深窗風雨響一眠蠶起食葉多
陌頭桑樹空枝柯新婦守箔女執筐頭髮不梳一月忙
三姑祭後今年好滿簇如雲繭成早檐前繅車急作絲
又是夏稅相催時

張中丞廟

延秋門上烏啼霜羯兒曉登天子牀江頭老臣淚暗滴
萬乘西去關山長公卿相率作降虜草間拜泣如羣羊
當時不識顏平原豈復知有張睢陽孤臣落日百戰後

瘦馬食尾人裹瘡男兒竟爲忠義死碧血滿地嗟誰藏
賀蘭不斬上方劔英雄有恨何時忘千年海上見祠廟
古苔叢林秋草荒摩挲畫壁塵網裏勇氣嗟嗟虬顛張
巫歌大招客酹酒忠魂或能來故鄉

真孃墓

金釵葬小墳楊柳寺前邨已斷花間信空歸月下魂山
鶯留曲韻草露帶啼痕車馬逢寒食還來酹酒尊

送謝恭

涼風起江海萬樹盡秋聲搖落豈堪別躊躇空復情帆
過京口渡砧響石頭城爲客歸宜早高堂白髮生

送宿衛將出守鄧州

中郎身領仗宿衛在承明舊射雙鵬落新乘五馬行紅
雲遙魏闕白水近穰城好勸諸年少春來賣劔耕

送沈左司從汪中丞分省陝西

重臣分陝去臺端賓從威儀盡漢官四塞河山歸版籍
百年父老見衣冠函關月落聽鷄度華岳雲開立馬看
知爾西行定回首如今江左是長安

送葉判官赴高唐時使安南還

銅柱崖前使節過貢隨歸騎入京多一官暫遣陪成瑨
片語曾煩下趙陀曉拜賜衣辭絳闕秋催征棹渡黃河
政餘好賦登臨咏聞說州人最善歌

弔岳王墓

卷一
大樹無枝向北風十年遺恨泣英雄班師詔已來三殿
射虜書猶說兩宮每憶上方誰請劔空嗟高廟自藏弓
棲鴉嶺上今回首不見諸陵白露中

吳王井

曾聞鑑影照宮娃玉手牽絲帶露華今日空山僧是汲
一瓶寒供佛前花

消夏灣

涼生白苧水浮空湖上曾開避暑宮清簟疎簾人去後
漁舟占盡柳陰風

題宮女圖

女奴扶醉蹋蒼苔明月西園侍宴回小犬隔花空吠影

夜深宮禁有誰來

吳縣楊基孟載

洪武初薦授江西行省幕官坐罪後起進按察
使被讒奪職供役卒工所

長江萬里圖

我家岷山更西住正見岷江發源處三巴春霽雪初消
百折千回向東去江水東流萬里長人今漂泊尚他鄉
煙波草色時牽恨風雨猿聲欲斷腸

遠浦歸帆

輕帆挂春風倒影湘江綠天低浦溆遠歸向誰家宿遙
指落花西黃陵廟前屋

洞庭秋月

湘水秋更清湘月秋更白光輝一相蕩水月不辨迹何處洞簫聲已陵夜歸客

岳陽樓

春色醉巴陵闌干落洞庭水吞三楚白山接九疑青空闊魚龍舞嬋娟帝子靈何人夜吹笛風急雨冥冥

● 春草

嫩色柔香遠更濃春來無處不茸茸六朝舊恨斜陽裏南浦新愁細雨中映水欲迷歌扇綠隔花偏襯舞裙紅平川十里人歸晚無數牛羊一笛風

故山春日

千花萬萼委塵埃只有荼蘼獨自開應是鄰家更零落過牆蝴蝶又飛來

望武昌

春風吹雨溼衣裾綠水紅妝畫不如却是漢陽川上女過江來買武昌魚

祁陽道中

疎煙小雨濕流光愁得楊花不暇狂半晌春晴便飄蕩綴人簾幕上人牀

吳興徐賁幼文

洪武初薦授給事中累官河南布政使尋下獄柳短短送陳道舜

柳短短春江滿蘭渚雪融香東風釀春暖山長水更遙
浩蕩木蘭橈蘭橈向何處送君南昌去離愁落日煙中
樹

白蘋花送王汝器

白蘋花綠蘼草南風吹碧波五月湘江道行人勸酒離
緒多權女權郎歌權歌黃鸝啼時風景好大隄日落奈
君何君今去不可留山疊疊水悠悠

女媧墓

空山兩高冢媧皇此中葬焦土積層巘勢助殿閣壯大
哉補天手功出千古上至今煉餘石火氣夜猶放轟雷
常被護烈風日掀蕩陰林慘可畏怪木高數丈百鳥飛
繞枝欲止不敢向地靈氣所鍾祭禱土人仰經過謁祠
下幸獲拜神像

霍山

霍山古北鎮勢尊出羣麓山深異風景春盡樹未綠居
人苦多寒鑿土爲住屋屋頂土元厚亦種麻與菽乃知
此方民猶有上古俗我欲拜其廟日斜去程促窯煙斂
暝色牛羊半歸牧征途多嶮巖邨館早尋宿

農父謠送顧明府調縣

我家茅屋臨官道前種桑麻後黎棗年年力作不違時
人有餘糧牛有草官長下車今五年老身不到州縣前
鄉無吏胥門戶靜家家盡稱官長賢大男入郭買田具

始知官長移官去來時憶向官道迎今日去時須送行
攀轅欲留留不止我民倉皇彼民喜殷勤再拜官道旁
願飲三江一杯水

送曾伯滋赴西河將幕

上將初分閫儒官解習兵風旗春獵野雪帳夜歸營洮
水從岷下祈山入隴平知公能載筆草檄報邊聲

南海孫贊仲行

洪武初授工部織染局使後除蘇州府經歷謫
遼東坐黨禍死

擬古

岐路一尊酒送君今遠行交持未及竟絲管激哀聲冉

冉歲華暮悠悠雲氣征馳車戒往路惻惻傷我情我情
默已傷歡愛不可忘昔爲春花妍今爲秋草芳秋草芳
有時夫君見無期獨宿坐長夜淚落如縷縻白日儻回
照孤懷君所知

湖州樂

湖州溪水穿城郭傍水人家起樓閣春風垂柳綠軒窗
細雨飛花濕簾幕四月五月南風來當門處處芰荷開
吳姬畫舫小於斛蕩槳出城沿月回菰蒲浪深迷白紵
有時隔花聞笑語鯉魚風起燕飛斜菱歌聲入鴛鴦渚

白雲山

白雲山下春光早少年冶遊風景好載酒秦陀避暑宮

蹋青劉鋹呼鑿道木棉花落鷓鴣啼朝漢臺前日未西
歌罷美人簪茉莉飲闌穉子唱銅鞮錦華往似東流水
昔時少年今老矣荔子楊梅幾度紅柴門寂寂秋風裏

下瞿塘

我從前月來西州錦官城下十日留回船正值九九節
巫山巫峽風颼颼人言灩澦大於馬瞿塘此時不可下
公家王事有程期敢憚微軀作人鮓人鮓甕頭翻白波
怒流觸石爲旋渦柁工敲板助船客破浪一撇如飛梭
灘聲櫓聲歷亂聒緊搖手滑櫓易脫沿洄劃轉如旋風
半側船頭水花潑船頭半側船尾高水花作雨飛鬚毛
爭牽百丈上崖谷舟子快捷如猿獠攏船把酒聊自勞
洞庭霜降水如油

龍江夜泊

蔣山山頭秋月明龍江江上暮潮生行人又是金陵客
卧聽西風鼓角聲

南海王佐彥舉

洪武初徵授給事中

書所見感舊

小小銀箏壓坐偏曾將古調寄新絃芙蓉綠水秋將老
鸚鵡金籠語可憐兩鬢秋霜明鏡裏十年春夢夜燈前

湖山隱約人何在空負當年罨畫船

美人紅葉圖

謝家夫人詠柳絮黃陵女兒歌竹枝誰信長門秋色淡
西風黃葉斷腸詞

閩中王偁孟揚

洪武庚午舉人永樂初薦授國史院檢討參英
國公張輔坐黨下獄死

短歌

東風吹花墮錦筵綠楊搖蕩青樓煙主人自為鸚鵡舞
小伎更奏鴛鴦弦當杯入手君未醉落日已在西山巔
短歌一曲心茫然請看明鏡高堂上何須白髮悲芳年

邕州

五管推名郡雙江接上游人家蠻霧曉山雨瘴煙秋遠
客誰青眼殊方易白頭今宵南極外分野望牽牛

宿巴陵聞笛

玉笛飄殘月下聲空江秋入思冥冥怪來楊柳移關塞
可是梅花落洞庭半夜旅魂隨調切誰家少婦倚樓聽
曉來更覓龍吟處一點君山水面清

左江

左江江水日潺潺鳥語莎裳住百蠻莫道天涯應在此
交州更隔萬重山

長興沈貞元吉

卜居橫玉山餘未詳

樂神曲 七首有序

樂神曲者擬楚辭九歌而作也吳人尚鬼祀必以巫覡迎送舞歌登獻其辭褻嫚穰災徼福不知其分滋黷甚矣故爲此辭以明鬼神之理禱祀之意祛其荒淫之志焉

保我之民兮邑此方崇其墉兮浚其隍民不驚兮志定眷靈修兮作民命隄楊兮結陰青青兮蔽林女牆堅兮有郭有郭繞洄灣兮濠歸于壑靈之來兮玄都颺旂旌兮若茶陳一豕兮兩輸載斟之兮百壺城兮隍兮吾永無虞

右城隍

嗟靈伯兮御清泠洗袪歎兮滌炎蒸駘蕩兮春初颺颺兮夏徂颺颺下兮木葉枯號空桑兮吹雪載塗靈之來兮憑女巫巫女兮屢舞箏簫兮伐鼓靈醉飽兮無怒蕭蕭來兮颺颺去

右風伯

佩芳蘭兮擘芬椒潔新服兮綴珠珎駕靈螭兮翔重霄要靈輅兮下迢迢我禾兮成役我田兮龜坼烈日兮驕陽利行水兮熱湯靈之徠兮天外下土乾兮霑一漑維靈布澤兮惠我無私嗟我民兮其敢斃思靈皇皇兮萃只舞傲傲以醉只福穰穰兮歲復歲只

右雨師

月維仲兮日維剛肅齋宮兮神所藏靈輝輝兮垂佩儼
飛馭兮高蓋降靈雨兮來斯左有翁兮右有妃悵嘉期
兮難又羌永歎兮陳辭靈修修兮不語逝翩翩兮歸去

右社公

波震蕩兮具區既底定兮奠神之居芙蓉蓋兮菱車導翠
龜兮文魚神之來兮孰俱後子皮兮前靈胥與神游兮
湖之滸衝風息兮極浦有倡兮妙舞有冽兮清醑神飽
聿歸兮或返而顧灌我田兮受神之祐

右太湖神

雄何爲兮屬於鄉祀有時兮享有嘗赭白馬兮青蓋明
而無兮晦而在屏方相兮去儼神巫進兮舞且歌雄欣
欣兮遠逝不水旱兮不疵厲樂吾民兮世世

右鄉厲

兩旗兮分張舞輕風兮悠揚神之司兮我疆原田每每
兮立我青秧不稂不莠兮無好無妨時雨兮時暘俾百
穀兮登場維神兮降康報之兮肴蒸膾羊

右青苗神

鄱陽錙炳彥昂

獻書任中書典籤出爲都督掌記

崩城操

朝從城上哭長城與雲齊暮從城下哭長城化爲泥鳴

呼城崩兮猶可築夫君死兮百身莫贖

嘉興冷謙啓敬

洪武初授太常協律郎

題燕肅山水卷

依稀廬岳高僧舍彷彿商山隱者家我入抱琴來谷口
白雲深處拾松花

福州谷宏□□

洪武初官中書舍人一云新淦人未詳

行經華陰

崔嵬太華出雲中積翠遙連渭水東秋色萬家連遠塞
暮煙一帶遶離宮秦關日落行人少漢時天陰古殿空

寂寞武皇巡幸處祠郊木葉起秋風

華亭管訥時敏

洪武初徵拜楚府紀善陞左長史乞致仕命祿
之終身

從征古州蠻迴塗紀驛

曹公兵敗處今識在嘉魚赤壁三分後烏林百戰餘橋
浮春渡闊舟泊夜江虛千古英雄事悲涼太史書

右石頭口

桃花江上驛春水賣新魚滿尺銀堪比千鱗錦不如因
歌悲客裏每食感王餘江海親朋少誰傳一紙書

右魚山

郊居

移家雖偏側只此足幽居茅屋三間小春田十畝餘人
來論稼穡自學把犁鉏東舍催租急烹雞酌小胥

姚氏野春堂

野外茅堂不掩扉堂前風日散晴霏梨花門巷清明近
春水池塘燕子飛每約鄰翁同社飲更從田畯勸農歸
明朝我亦尋春去小試東風白苧衣

答吳高士

青鞵布韞木棉裘合是山中隱者流舉世可無劉越石
薦賢誰是呂婆樓秋風泖蟹年年上春水沙鷗日日浮
好爲攜琴并載酒三高祠下放扁舟

送瀘州判官

新除貳守向瀘川西上長江萬里船行李莫辭爲客遠
判花政喜得君賢官鹽歲汲千家井火米時收五月田
緩帶從容有佳興寄詩細寫薛濤牋

送客

黃鶴磯頭上驛船柁樓搗鼓下晴川客行二月梨花後
人別東風燕子前

吳興王蒙叔明

洪武初爲泰州知州或云坐胡黨卒於獄

閒適

綠楊堪繫五湖舟袖拂東風上小樓晴樹遠浮青嶂出

春江曉帶白雲流古今我愛陶元亮鄉里人稱馬少游
不負平生一杯酒相逢花下醉時休

題荆溪圖

太湖西畔樹離離故國溪山入夢思遼鶴未歸人世換
歲時誰祭斬蛟祠

宮詞

南風吹斷采蓮歌夜雨新添太液波水殿雲房三十六
不知何處月明多

慈溪烏斯道繼善

洪武初薦起知石龍縣調永新以疾去

馬食粟

馬食粟一閑二百匹一食一百斛去年大旱人苦飢草
根食盡食木皮官司徵粟喂官馬馬何貴重人何微人
心不敢怨只願官馬肥官馬肥走若飛江南江北正格
鬪將軍殺賊要馬騎

澤畔

上征天無風遠游橐無金種蘭蘭不芳行吟向江潯漁
父曠達者庶幾知我心鶴鳴子不和徒然有哀音踟躕
當奈何湘水清且深

平陽林子森

洪武初舉秀才爲臨洮府經歷

鎮遠道中

行盡荒林晚未休
鷓鴣聲斷碧山秋
逢人數問前程路
九十長亭是貴州

海寧胡奎虛白

洪武初寧府教授

吳江竹枝詞

青裙女兒雙髻螺
唱出吳宮子夜歌
酒醒月明眠不得
秋風吹起太湖波

西山日落東山黃
儂唱竹枝行晚涼
十幅蒲帆弓樣滿
南風吹送白龍堂

崑山袁華子英

洪武初府學訓導

蹋踘篇

冶家女兒髻偏梳
教坊出入不受呼
蹙金小鞞飛雙鳧
飛雙鳧曳雙袂
玉圍腰珠絡臂

太倉衛偶桓武孟

洪武中舉秀才為崇安從事授桂林河泊大使
終荆門州吏目

早發灘江示同舟戴伯貞

夜泊南熏亭曉上白石潭
北風颯以爽蕭蕭動征衫
灘水激沙礫桂嶺浮煙嵐
顧此道里修遙在天南
常恐瘴癘惡三年情不堪
今晨始得歸灑然脫塵凡
况遇同袍友高歌酒初酣
搔彼頭上雪短髮各鬢髮
相顧但一

歎往事悉已諳林泉在何處爲我洗餘慚

赴夷陵

迢迢上夷陵意促目未騁亂石剗馬蹄叢棘冒衣領登山若攀天度壑如赴井撫膺欲嘔心喘息屢延頸但逢過虎跡負絕行人影顧茲客懷惡况乃道里永豪素難具陳聊以述旅境

秦文仲授溧陽教諭賦別

淮海秦徵士鬚髯雪滿顛五年三拜詔十日九朝天自許償詩債誰能與酒錢冷官歸更好不負舊青氊

送陳民初歸廣州兼訊趙知事

靜江遙帶五羊城官舸乘風畫鷁輕客館鄉人秋送別

高齋弟子日相迎枕榔接葉蠻煙暗螺蚌含珠海月明到郡爲詢賢贊府幾時鞍馬定朝京

新淦練高伯上

洪武中知起居注以直言出爲廣德州同知終鎮安府通判

送趙將軍

崆峒一劔倚秋陰誰識將軍百戰心老去功名餘白髮閒來歌舞散黃金呼鷹大澤風竿勁射虎南山雪羽深敲缺唾壺銀燭短時人不解隴頭吟

錢唐瞿佑宗吉

洪武中薦授訓導升周府右長史永樂間謫戍

保安洪熙乙巳赦還

天魔舞

承平日久寰宇晦選伎徵歌皆絕代教坊不進胡入聲旋
女內廷自試天魔隊天魔隊子呈新番似佛非佛蠻非
蠻司徒初傳秘密法世外有樂超人間真珠瓔珞黃金
縷十六妖娥出禁籞滿圍香玉逞腰肢一派歌雲隨掌
股飄飄初似雪迴風宛轉還同雁遵渚桂香滿殿步月
妃花雨飛空降天女瑤池日出會蟠桃普陀煙消現鸚
鵡新聲不與塵俗同絕技頗動君王覩重瞳一笑天回
春賜錦捐金傾內府中書右相內臺丞袖無諫草有曲
譜天魔舞筵宴開駝峰馬乳黃羊胎水晶之盤素鱗出

玳瑁之席天鵝擡彈胡琴哈哈迴吹胡笳阿牢來羣臣
競獻葡萄杯山呼萬歲聲如雷天魔舞不知危高麗女
六宮妃西番僧萬乘師回紇種類皆台司漢兒回避南
人疑天魔舞樂極悲察罕死孛羅歸鐵騎驟金刀揮九
重城闕煙塵飛一榻之外無可依天魔舞將奈何多藏
金叵羅急駕白雲駝陰山之北避兵戈

春社詞

十日一風五日雨社前拜祝神已許瓦盆潑灑斟濁醪
高俎縱橫薦肥犂鳴鳴笛聲坎坎鼓俚曲山歌互吞吐
老巫狡獪神有靈傳得神言爲神舞祭餘分肉巫自與
醉裏狂言相爾汝小兒覓餅大兒扶頭上神花付鄰女

清明

兼旬蹭蹬在京華又見東風御柳斜
客裏不甘佳節過借人亭館看梨花

錢唐平顯仲微

洪武中以薦起知藤縣謫戍雲南沐國公延為

西席

題丁野夫畫

野夫已沒四十載化鶴歸來知是非
郭外梅邨更地主筆端松石見天機
一時好手不可遇千古賞音如此稀
長憶西湖舊遊處畫船秋雨白鷗飛

錢唐施敬孟莊

洪武中謫居滇

巴陽夜泊

獨權三巴夜秋高片月孤灘聲將客夢
萬里下東吳

貧樂軒

長卷束牛腰簞瓢繫牛角讀書深樹中
不知山日落

南行

萬里移家入瘴煙故鄉音耗若為傳
衡陽自古無來雁况去衡陽又八千

憶舊

昆陽市上美人家飲酒曾停過客車
萬里相思不相見東風吹盡蜜檀花

新淦練子寧名安

洪武乙丑榜眼累官工部侍郎建文時遷御史大夫靖難兵入不屈死

二月望日與饒隱君遊玉笥山謠

我懷謝康樂獨往遊名山身同雪舟繫心與浮雲閒清風淡蕩灑六合令我興在雲松間玉山高與南斗齊雲錦照耀廬山低三十六峰凌虹霓飛湍噴雪臨迴溪長松挂月青猿啼上有梅仙采藥之幽棲下有蕭雲讀書之故基洞天石扇杳莫測瑶草謾長三春萋我欲因之覽八荒手拂青蘿眠石牀回飈吹散碧天霧清冥倒瀉澄湖光作為玉山謠寄之雙峰客興來攜妓秋復春笑

殺東山謝安石

分宜黃子澄伯淵

洪武乙丑探花累官翰林學士靖難兵入磔死

枯梅

百千年樹未全枯三五個花何太疎聞道石門春意動不知曾有暗香無

華亭袁凱景文

洪武中徵拜御史永樂初佯為狂疾放歸

客中除夜

今夕為何夕他鄉說故鄉看人兒女大為客歲年長戎馬無休歇關山正渺茫一杯柏葉酒未敵淚千行

邨居懷京下一二友生

罷職非能吏歸田卽老農有詩聊度日無字可書空白
髮將誰念黃梁且自春故交能問訊家在五湖東

春園

春園江水上江霧日昏昏沙暖長垂釣花深不閉門家
童鉏隴麥野客共盤餐衰老仍耽酒經年嬾出邨

白燕

故國飄零事已非舊時王謝見應稀月明湘水初無影
雪滿梁園尚未歸柳絮池塘香入夢梨花庭院冷侵衣
趙家姊妹多相妒莫向昭陽殿裏飛

得家書

江水一千里家書十五行行行無別語只道早還鄉

淮東逢張十二信

少年追逐共西東吳邁文章馬亮弓一自干戈零落後
白頭淮海獨相逢

題蘇李泣別圖

上林木落鴈南飛萬里蕭條使節歸猶有交情兩行淚
西風吹上漢臣衣

吉水解縉大紳

洪武戊辰進士試中書旋待詔翰林永樂初累
進翰林學士後爲高煦所譖下獄沃以燒酒埋
雪中死

彭澤

青山圍一縣隱隱見人家亂石邊江出孤帆帶日斜翠
添官舍柳香泛驛樓花不見陶彭澤湓城起暮鴉

送劉綉衣按交趾

虬髯白皙綉衣郎驄馬南巡按越裳城郭新開秦郡縣
山河原是漢金湯天連銅柱蠻煙黑地接珠崖海氣黃
莫說炎荒冰雪少須令六月有飛霜

龍州

波羅蜜樹滿城闐銅鼓聲喧晝賽神黃帽葛衣墟市客
青裙錦帶冶游人

臨海方孝孺希直

建文中文學博士靖難兵入不屈族

閒居感懷

三首

竊竊衆所憂不踰衣食間孰知溫飽外可憂非一端賤
憂道難行貴憂名不完誰能斷棄此自樂如孔顏
我非今世人空懷今世憂所憂諒無他慨想禹九州商
君以爲秦周公以爲周哀哉萬年後誰爲斯民謀
士無及物智每喜華其廬我居豈不敞於道亦有餘明
取容吾身奧取藏吾書奚須歎其陋不見阿房初

上巳約友登南樓

生意忽滿眼不知春淺深良朋曠嘉會濁酒難孤斟迨
迨城上樓高朗宜遠臨曷不一舉足縱望淵與岑逍遙

羣動表舒豁萬古心古人已寂寞繼者應在今蘊真有
至樂外慕非所欽願言領衆妙無爲鬱冲襟

斲蕨行

並海飢民千百數攜鉏上山斲山土蕨根已盡斲不休
力絕筋疲未言苦屋頭五日無炊煙十步九却行不前
全家性命係朝暮弱子假息阿母眠昨日斲蕨僅盈斗
今日蕨根不滿手但憑斲蕨保餘生再拜青山感恩厚
青山青山爾勿猜明朝未死攜鉏來

懿文太子輓詩

相宅圖方獻還宮疾遽侵鼎龜懸寶命笙鶴動哀音誰
紹三皇治徒傾四海心關中諸父老猶望翠華臨

泰和楊士奇名寓

建文時以辟召入翰林永樂中累官華蓋殿大
學士宣德中進少師

漢江夜泛

泛舟入玄夜奄忽越江干員景頽西林列宿粲以繁凝
霜飛水裔回飈蕩微瀾孤鴻從北來哀鳴出雲間時遷
物屢變游子殊未還短褐不掩脛歲暮多苦寒悠悠念
行邁慊慊懷所歡豈不固時命苦辛誠獨難感彼式微
詩喟然興長歎

賦得滄浪送陳景祺守襄陽

漢水帶襄城滄浪舊有名分符來五馬如練照雙旌濟

涉思爲楫聽歌想濯纓須令郡人說堪比使君清

宣德丙午謁二陵

去年侍從謁長陵此日重來慟倍增春柳春花渾似昔
獻陵陵樹復層層

永豐曾棨子啓

永樂甲申狀元累官詹事府少詹

呂梁洪

洪流昔懷襄區域信茫昧斯民靡寧居嬰此昏墊害呂
梁塞衝波滔天勢橫潰怒霆鬪鏗訇飛瀑瀉澎湃神哉
夏先后敷理乘四載沛然導東注下與百川會造化有
設險惟此乃其最扁舟沂奔流涉歷今已再水師身手

捷徑渡良足快緬懷胼胝勞遺跡遠猶在偉茲疏鑿功
萬世終永賴

駕發臨城

雞鳴寒漏徹車駕發臨城殘月千山曙浮沙一路平雲
光隨鳳輦露氣濕霓旌馬上頻回首猶看燎火明

車駕渡江

朱旗畫戟擁晴沙錦纜牙樯照水涯佳氣迴浮江北樹
日光初照海東霞雲中鸞鳳扶丹轂水底魚龍識翠華
不用臨流羨天塹只今四海盡爲家

在平

地旱空多井林疎遠見樓平山通縣界漂水入河流過

客詢張鎬鄉人說馬周北來多古蹟惜未得淹留

夾溝

東風吹暖柳絲柔十里青山繞夾溝馬上逢人相借問
計程兩驛到徐州

吉水周述象述

永樂甲申榜眼官至左庶子

賜觀燈

今夕逢元夕歡聲遍九垓星臨銀漢動月傍碧空來紫
禁千花繞金門五夜開聖情同宴賞玉漏不須催

寄楊顯道先生

我憶楊夫子風流似昔人素琴長對月白髮不憂貧彭

澤陶元亮稽山賀季真相思欲相見煙樹幾回春

安福李時勉名懋

永樂甲申進士累官國子祭酒卒

古詩爲竇滔妻作

昧旦不能寐攬衣起中堂織縑與織素誰復知短長咫
尺組幽思迴還遂成章緘之戒僮御欲以寄遠方宛轉
達苦志敢期昔所伉

別久意恒親覽辭念愈結巾車適千里倏忽已超越鳴
琴諧古調恩愛感中歇夙心諒所負慙歎對明月曠言
固終始皓首以相悅

咏剪刀

吳綾剪處魚吞浪蜀錦裁時燕掠霞深院響傳春晝靜
小樓工罷夕陽斜

廬陵周忱恂如

永樂甲申進士累官工部侍郎巡撫河南陞戶
部尚書卒

尋天台李道士齋

瑶草迷行徑丹臺近赤城山川遙在望雞犬不聞聲谷
靜松花落橋橫澗水鳴雲間雙鶴下疑聽紫鸞笙

廬陵李禎昌祺

永樂甲申進士累官廣西布政使改河南

端午日游少林寺

少林聳岩堯有路達蔥嶺半生懷勝槩老乃踐真境緇
流遠見迓偏袒仍露頂升高縱遐觀頗覺痴緣屏蒲風
翻卷帙艾色侵衣領掇蔬僧具供飲騎童汲井自拈清
淨香作禮爇古鼎超超昔神師順寂同溟滓而於片石
上留此不滅影竺夏雖異轍皆貴能猛省寒巖許分坐
禪定畢餘景

留魯山縣

黎庶凋殘甚惟餘朴儉風名因元子重地本魯王封撫
卹無賢令流移有情農誰將于薦曲歌向五雲中

新野卽景

邨暗濛濛雨流渾淺淺溪菊花長帶濕豆莢半沾泥野

迴居民少林昏去路迷自投新野界蒿草與人齊

送周秀才遊長沙

迢遞長沙道逍遙歲宴遊亂山黃葉寺孤棹白蘋洲夕
鳥衝船過寒波背郭流毋論卑濕地賈傅昔淹留

泰和陳循德遵

永樂乙未狀元累官華蓋殿大學士正統復辟
戍鐵嶺尋放還

開平

灤河河北開平府云是前朝故上都萬瓦當年供避暑
孤城此日事防胡龍岡夜照烏桓月鳳輦時巡敕勒區
何處登臨最愁絕李陵臺上望平蕪

河津薛瑄德温

永樂辛丑進士除御史累官禮部左侍郎兼文
淵閣大學士

游習家池

谷口一逕入蒼山四邊開中有習池水水碧無纖埃泉
源初噴薄交流遂滌洄飛鳥鏡中度行雲天外來微風
一蕩拂林影久徘徊寒光空心性俯翫何悠哉愛此不
能去載歌寫中懷

游君山寺

爲愛湖中山遂尋山下路取徑彌幽遐涉澗亦回互石
磴足莓苔青林雜煙霧前行如有窮嵐嶺乍分布招提

壓重湖千里周一顧孤峰四無垠形氣自依附山僧復
導我窈窕更徐步疎籬野蔓懸老圃寒泉注逕轉山房
深重與絕境遇白雲檐外生清風竹間度庭花雜無名
歲晏色猶故澄心得妙觀忘言契良晤愛此林壑清遂
薄塵俗務重來待何時尚子畢嫁娶

褒斜道中

褒斜一何深長谷自迤邐雲木青無邊羣峰各峻峙鳥
道緣厓顛危棧架江涘冥冥叫子規決決響溪水累日
山峽中陟降亦勞只自我入蜀門今逾一年矣旣乏督
辦能兼負素餐恥而况鬚髮蒼胡寧不知止上章乞解
綬詔許感不已雖云此谷險且遂北歸喜

黔陽山中

景好寧知是異邦竹籬茅舍枕蒼江吏情更有山林趣
綠樹門前畫戟雙

錢唐于謙廷益

永樂辛丑進士除御史擢行在兵部右侍郎宣
德踐阼拜兵部尚書加少保正統復辟棄市

自歎

我生四十餘已作十年客百歲能幾何少壯難再得今
朝太行南明日太行北風雪敝貂裘塵沙暗金勒寒暑
互侵凌凋我好顏色齒牙漸搖脫鬚髮日以白位重才
不充况此遲暮迫早賦歸去來庶免清議責

游春

滿路香塵起尋春思欲迷樹晴鶯出谷溪暖燕銜泥玉
勒嘶芳草青樓瞰大堤風光無限好都在畫橋西

上太行

西風落日草斑斑雲薄秋容鳥獨還兩鬢霜華千里客
馬蹄又上太行山

暮春客途卽景

雨中紅綻桃千樹風外青搖柳萬條借問春光誰管領
一雙蝴蝶過溪橋

擬吳儂曲

憶郎直憶到如今誰料恩深戀亦深刻木爲雞啼不得

元來有口却無心

安福劉球廷振

永樂辛丑進士授禮部主事改翰林侍講以忤
王振矯旨下獄死

山居

水抱孤邨遠山通一徑斜不知深樹裏還住幾人家

閩縣王恭安仲

永樂初薦授中書與修大典投牒歸

去婦詞

刺促何刺促東家迎婚西家哭哭聲休使東家聞東家
車馬方如雲滿堂笑語看珠翠夾道風傳蘭麝熏浮雲

卷一
上天花落樹君心一失無回悟明知遣妾何所歸飲淚
行尋出門路青銅鏡面無光采妾心尚在容華改東家
新婦傾城姿似妾從前初嫁時

雞公壟

荒岡古墓雞壟邊蔓草離離生野煙狐狸養子隱荆棘
烏鳶作巢銜紙錢石麟埋沉土花溼月下精靈語還泣
此墳未必無子孫浮榮一去不復存誰家新冢高數尺
又買西家墳上石

感懷

不彈貢禹冠不結蕭朱綬幾處移家任轉蓬半生失路
惟耽酒兔園挾策竟徒然欲逐長沮學種田秋風僅有

相如壁舊物空餘子敬擅異鄉淪落無朋友論交昨日
今何有誤將偃蹇對時人豈謂新知不忠厚萬事蕭然
一布衣白頭夢想故山薇抱琴欲奏猗蘭曲目送雲天
斷雁飛

聞笛歌送人之塞上

橫笛對離亭扁舟越江口月下何人最斷腸天涯怨別
驚楊柳此夜愁心獨對君明朝悵別又離羣單于城上
吹羌管知爾相思不忍聞

鷓鴣

綠樹殘春暗雙飛錦翼齊長沙有遷客莫向雨中啼

春雁

春風一夜到衡陽
楚水燕山萬里長
莫怪春來便歸去
江南雖好是他鄉

山樓對酒

樓前積水映蒼苔
卷幔孤雲落酒杯
更盡一尊秋雨外
故山曾有幾人回

月下聞箏

愁心不見薛瓊瓊
何處銀箏半夜聲
腸斷十三絃上月
一絃一柱總關情

長洲劉珏廷美

正統戊午舉人除刑部主事歷官山西按察使

朱仙鎮岳王祠

郟北師還事已休
憑誰重報靖康讐
洛中故國非周土
江左新亭半楚囚
和議自遺千載辱
蠟書空送兩宮愁
傷心多少英雄淚
付與漳河日夜流

泊舟垂虹橋

貫酒烹鱸敵暮寒
垂虹橋上倚闌干
行人笑指詩翁嬾
不到城中訪縣官

梅

歲寒相見在天涯
玉色珠光帶露華
笑殺玄都狂道士
種桃何不種梅花

淳安商輅弘載

正統乙丑狀元累官謹身殿大學士

題春景山水

愛此佳山水春來景更妍四郊青嶂合孤岫白雲連地
迴輪蹄絕峰危石磴懸小橋臨曲澗遠浦接平田鬱鬱
林間寺潺潺竹下泉桑麻凝暮藹榆柳繞晴川寶殿凌
千尺茅堂敞數椽僧歸西嶺月漁釣北溪煙倒浸沈波
塔閒橫古渡船樓高平見日松老不知年鳥度浮嵐外
鷗飛落照邊吟筇芳草徑酒旆杏花天隔岬聞鶯語開
軒待鶴旋砌苔深染黛林籟細鳴絃有路通仙境無塵
遠市廛家山在圖畫觸目思飄然

新會陳獻章公甫

正統丁卯舉人薦授檢討卒

題新邨書齋

茅棟依巖靜柴門斫竹通桑榆巷南北煙火埭西東一
徑漁樵入孤邨井臼同鄰家得美酒吹笛月明中

梅花

沙籠寒月樹籠煙香徹龍溪水底天斜隔竹林窺未得
更尋西路上漁船

桃花

雲鎖千峰午未開桃花流水更天台劉郎莫記歸時路
只許劉郎一度來

留姜仁夫

雲去雲來等是浮獨凭高閣看江流南風莫送東歸客

更共江門一日游

濠州郭登元登

武定侯英諸孫景泰初官都督僉事守大同功
封定襄伯正統復辟謫戍甘肅成化初復爵卒

甘州卽事

黑河如帶向西來河上邊城自漢開山近四時常見雪
地寒終歲不聞雷牦牛互市番氓出宛馬臨關漢使回
東望玉京將萬里雲霄何處是蓬萊

口號寄涇州守李宏

渡了黃河又黑河春風秋月五年過涇陽太守如相問
更比來時白髮多

至高郵逢邢勉仁

客中相見倍相親白酒黃雞莫笑貧君住淮南我淮北
如何不是故鄉人

甘州

甘州城西黑水流甘州城北黃雲愁玉關人老貂裘敝
苦憶平生馬少游

濬縣王越世昌

景泰辛未進士天順中以御史超拜副都巡撫
大同進兵部尚書論出塞功封威寧侯佩征西
將軍印加少保兼太傅卒

中秋對月用孟浩然韻

明月下空庭清光寒不濕褰簾坐未久忽見飛螢入空
懷寂無聊何處砧聲急對酒不成吟起向西風立

榆陵送武靖侯趙公還京

古人一日別常懷千里思况在天之涯而與君相離風
寒歲云暮夜永雞鳴遲悠悠行路難苦樂心自知人生
如浮雲聚散安可期君歸日以遠我歸當何時豈不念
鄉國顧此王事縻霜月滿孤城照見遊子悲

遊金龍池

雲深池水寒流出青山口雲水復何心鷗鷺自相友時
維秋氣涼佳節近重九侵曉解征鞍徘徊日將酉歷覽
古遺蹤因之問邨叟叟云吾不知世遠人亡久文獻不
足徵請看池上柳遙遙數百年今亦半枯朽人生能幾
何少壯忽老醜往事無足論且盡杯中酒

初度

今年四十八去年四十七明年四十九五十爭幾日逆
數六十來光陰彈指疾七十從古稀八十安可必所以
百歲人千萬不見一嗟哉宦海中悠悠良可恤

送周宗太與論詩

可憐相見未能久無那匆匆又分手臨岐把袂且談詩
何用尋常一杯酒古詩起於列國前孔子刪爲三百篇
發乎情性止禮義所以音律皆自然後來風雅不復作
獨有離騷味堪嚼秦漢已下雖頗淳已食古人之糟粕

盛唐取諸杜少陵西晉取諸陶淵明少陵忠義所感激
淵明渾然而天成五代之詩無足齒宋人之詩理而已
抑揚辭氣欠從容遂失溫柔敦厚旨元人之詩學晚唐
巧者自巧狂者狂大音元氣日凋喪詩道至此幾云亡

雁塢

慈恩古塢一閑登瘞鶴銘亡問寺僧舊壁遍題唐進士
遠煙多見漢原陵感懷已寄無窮事縱目還須最上層
不省風鈴緣底語只今誰是佛圖澄

海鹽張寧靜之

景泰甲戌進士官禮科兩使朝鮮轉都給事出
知汀州府

重遊金粟寺

溪迴通小艇山峻露層臺林葉經霜盡河水近午開閒
雲僧出定舊雨客重來擾擾浮生路經過定幾回

莫愁樂

金雀玉搔頭生來字莫愁自從歡去後不出石城游

園梅盛開

暖透孤根雪乍消冰花萬點綴寒條尋幽欲寄山中客
忘却西湖有斷橋

後浦漁歌

欸乃新聲度遠汀煙消日出樹冥冥年來悟得滄浪意
長近西堂竹下聽

蘋花館

宿水停煙綠近牆繞門葭莢共蒼蒼寒香欲薦無人采
月落空庭夜有霜

寄余驛丞

南薰亭館晚相延屈指星霜又十年不是重來渾忘却
黃昏舟過驛門前

瓊山丘濬仲深

景泰甲戌進士由庶吉士累官武英殿大學士

擬古

依依重依依不忍生別離別離已可悲况值秋風時柳
衰不堪折情苦不堪說願妾為小星君身化明月明月

貼天飛小星恒相隨月出星隨出月歸星亦歸莫學秋
胡妻相逢不相識生者固可慚死者亦何益

邨行

萬里勞行役驅車趁晚晴鴉邊殘照遠雨外斷虹明山
徑高低路邨春遠近聲隔林人語寂一犬吠相迎

崑山沈愚通理

未詳

閩門柳枝詞 二首

小蠻能唱白家詞笑把纖腰鬪柳枝愁絕樽前春未老
風流太守鬢成絲

枝枝搖翠綰香車占斷春風日未斜記得皋橋舊游處

綠煙深鎖太孃家

過桃葉渡

江花含笑欲爭春
江水籠煙柳色新
商女停舟唱桃葉
東風愁煞渡江人

旅次送晏振之

西風孤櫂楚江濱
煙水殘陽照白蘋
底事送君情轉切
只緣身是未歸人

陳宮懷古

景陽宮井積浮埃
三閣遺基半綠苔
惆悵後庭花落盡
黑頭江令獨歸來

茶陵李東陽賓之

天順甲申進士由庶吉士累官華蓋殿大學士

申生怨

十日進一胙君食不得嘗
讒言豈無端兒罪誠有名
兒心有如地地墳中自傷兒
生不如犬犬得死君傍天地
豈不廣日月豈不光悲哉復何言
一死以自明

司農笏

司農手中無寸鐵
奮笏擊賊賊腦裂
賊雖未死氣已折
奉天天子雙淚橫
十年棄卿真負卿
臣身區區勞記憶
平原太守曾未識

十六州

契丹助晉兵一號三十萬
晉人報契丹一數一匹絹三

十萬絹未足惜一十六州空棄擲遂令宋統成偏安中原以北無幽燕金元相承二百載慟哭衣冠化兜鍪至今五鎮接三邊不備西陲備東海

王孟端竹長卷

九龍山翁興豪放手持蜿蜒青竹杖酒酣怒擲江中流化作一龍長數丈一龍躍起一龍隨倏忽羣龍駭奔浪穿沙觸石連雲霧頭角森森各相向其間小者稱籜龍鱗甲蛻盡風神同人道此翁善劇戲造化乃在指掌中君不見九龍山翁去何許九龍山上多風雨素壁空堂杖影寒夜半無人作龍語

題湖山春曉圖

湖船著水平無簑篷上使篙篷下坐山光四面錦屏開橋影中天彩虹卧輕鴉拂樹還千點老鶴叫空時一箇客宴遙將綺席隨游人不惜青鞵破江南風物今餘幾看畫題詩兩無那却恐湖山畫不如他年自買扁舟過

九日渡江

秋風江口聽鳴榔遠客歸心正渺茫萬古乾坤此江水百年風日幾重陽煙中樹色浮瓜步城上山形繞建康直過真州更東下夜深燈火宿維揚

吉安府

山勢西來斷江流北去平萬家深樹裏聞是吉州城西園秋雨詠苔

豈不愛佳客畏人踐我苔西園十日雨三徑不曾開

春園雜詩

三月三日佳麗辰五十五年衰病身閉門一枕午時夢
江草江花無數春

長沙竹枝歌 二首

馬殷宮前江水流定王臺下暮雲收有井猶名賈太傅
無人不祭李潭州

江頭彩旗耀日明船上搥鼓不停聲湖南樂事君記取
五月五日潭州城

明詩去浮卷一

明詩去浮卷二

古吳 施何牧 錄次

長洲吳寬原博

成化壬辰狀元由修撰歷吏部侍郎進禮部尚
書兼詹事

分韻送貞伯

忽對春風南陌還思夜雨西窗高丘恨不千尺望見離
人渡江

題畫

水長鵝肫蕩口花飛鶯脰湖邊吳歌唱徹歸去日暮青
山滿船

除夜

夜深燈火四無鄰
強醉金陵麴米春
却憶去年何處宿
三叉河口更愁人

安寧楊一清應寧

成化壬辰進士授中書累官華蓋殿大學士

聞河套有警

百二秦關故可憑
延寧千里險堪乘
濁河下遶還成套
曠騎冬來慣蹋冰
塞上煙塵嗟未息
胸中兵甲媿無能
粟芻山積君休羨
民力年來已不勝

竹西書屋

萬竹參差路不分
草堂風景隔塵氛
他年有約東鄰卜

半爲先生半此君

和西涯漫興

園亭風日入清秋
綠樹重陰護四周
頗恨青山看不見
似應別起看山樓

泰州儲壻靜夫

成化甲辰會元累官吏部侍郎

歸雲洞

悠揚滿洞中歸來
不知處曉起語農人
春田夜多雨却
問洞中雲何時下山去

望岐溝

野水荒煙沒斷橋
欲尋遺老問前朝
不因書記班師奏

未必岐溝定屬遼

老米店有感

層冰一夕塞河船
記得攜家已十年
鮭菜燈前誰共飯
月明行店一悽然

樂平喬宇希大

成化甲辰進士授禮部主事累官吏部尚書加少保卒

秋風亭下泛舟

荒亭寥落野雲空
漢武雄才想像中
簫鼓橫流開畫鷁
帆檣飛影動晴虹
山分秦晉羣峰斷
水入河汾兩派通
少壯幾時還老大
不堪回首歎秋風

合州鄒智汝愚

成化丁未進士十三領解以庶吉士建言請斥萬安等後坐誣謫石城吏目居四年暴卒

辭朝

雲韶聲靜拜彤墀
轉覺心驚不自持
罪大故應誅兩觀
網疎猶得竄三危
盡披肝膽知何日
望見衣裳只此時
但願太平無一事
孤臣萬死更何悲

豐城楊廉方震

成化丁未進士累官南禮部尚書

哭鄒汝愚

海舶傳消息傷心
遂不還死同鄒別
駕窮過蔡西山絕

識何由得英風竟莫攀惟餘前日疏傳寫遍人間

直科口占

南科自分一枝安北轉惟添待漏寒吏事兩京終是少
諫官直恐是閒官

題曹憲副采蓴卷

三泖秋霖浸四圍水邊未覺露葵稀金盤玉箸長安客
幾箇西風爲汝歸

長洲沈周啓南

高士

西山有虎行

西山人家傍山住唱歌采茶山上去下山日落仍唱歌

路黑林深無虎慮今年虎多令人憂遶山搏人茶不收
牆東小女膏血流邨南老翁空髑髏官司射虎差弓手
自隱山家索雞酒明朝入城去報官虎畏相公今避走
竹堂寺與李敬敷楊啓同觀梅

竹堂梅花一千樹晴雪塞門無入處秋官黃門兩詩客
珂馬西來爲花駐老翁攜酒亦偶同花不留人人自住
滿身毛骨沁冰影嚼蕊含香各搜句酒酣塗紙作橫斜
筆下珠光濕春露明朝重來花有無只愁此紙卷春去

吳江史鑑明古

布衣

韜光菴

韜光古精舍遠邇西山岑岡岫屢迴復雲嵐杳深沈流
泉激修竹綠蘿被芳林密葉翳朝陽芳柯承夕陰杖策
遵微徑逝將支遁尋行行未易卽遙聞鐘磬音徒倚絕
塵想冥思諧道心搴芳詠招隱松風和悲吟

送郭訓導

仲秋百卉腓旅雁思南翮涼風吹客衣嗟君事行役三
調不徙官依然在儒籍皇朝重文教此任故精擇諸生
得造就疑義資剖析入室與升堂煌煌盡珪璧冷熱固
人情於君自無斃浩歌菁莪篇芳塵滿瑤席

懊惱曲

行路莫行遠看花莫看遲花遲少顏色路遠長別離

子昂蘭

國香零落佩纒空芳艸青青合故宮誰道有人和淚寫
託根無地怨東風

長洲趙同魯與哲

布衣

平賦詩

於赫皇明奄有萬方貢賦包篚罔不來王矧茲畿甸揚
州之野厥土塗泥厥田下下因地制賦初匪不均末流
敝剗輕重攸分或輕而腴或重而瘠富食其利貧罹其
厄宣皇憫焉明詔是頒十宥其三民用乂安逮乎邇年
歲稔癘作老弱纍纍填溝委壑事旣上聞屢下優詔亟

命大臣撫綏慰勞賑之雖至民則未甦繼命我公我公
曰吁盍澄其源盍正其本不釐爾賦曷紓予悃輕重參
停各盡其情如鑑之公如衡之平若解倒懸若拯焚溺
謳歌鼓舞道路充斥譬彼雪壑釋然春融誰其致之實
惟我公何以報之願公受祉毋久賢勞歸相天子天子
元首我公股肱一德交孚福我蒼生野人作頌敢告太
史祝我皇朝億千萬祀

江陰薛章憲堯卿

布衣

趵突泉

感沸趵突泉發源自王屋狀流溢爲滎迤邐陶丘北黃

山渴馬厓入地乃更伏潛行五十里突爾出平陸曾不
舍晝夜東匯成川澳乍似滄浪水浴出三白鵠更疑清
泠淵白龍服魚服蒲荷相蔽虧鳧藻舞濡淥踟躕不忍
去奈此白日速

海鹽朱朴元素

布衣

苦哉行

年荒莫蠲糧蠲糧民益荒歲歉莫賑濟賑濟民益傷虛
名及小戶米入官家倉僅爲公門需那得充飢腸苦哉
復苦哉淫雨天降殃但聞流水聲不見白日光菜甲短
棲畝麥苗已萎黃濕薪及爛齧其價十倍強二月春已

半桃李無豔陽出門泥淖深况復多虎狼苦哉難重陳
淚下霑衣裳

寒食行

寒食清明天氣晴家家上墳齊出城小家叢冢不栽樹
雖有紙錢無挂處大家新墳松柏多羅城石柱高嵯峨
兒孫跪拜女婦哭杜鵑啼血黃鸝歌誰家古墳生荒草
滿地落花人不埽當時從葬極繁華碑碣猶書鳳鸞誥
鑿地聚土作玄宮術人指點求三公三公不來術人去
只有石獸嘶秋風子孫流落無可奈翻道此墳風水害
又疑棺槨有金銀掘作平田向人賣嗚呼世間萬事空
紛紜貴賤變化皆浮雲生前但有一杯酒身後何須三

尺墳

靈隱寺

合澗橋頭水飛來洞口山鳥盤蒼壁影僧掩翠微關松
露晝還滴巖花秋更斑一年嘗一到一到一忘還

西湖竹枝詞

阿儂家住湖水傍菰米萁絲野飯香貓頭紫筍尺圍大
沙角紅菱三寸長

長洲吳一鵬南天

弘治癸丑進士累官南吏部尚書

塞上曲

去年搜河套今年搜河套河套水草多反以資寇盜歎

息漢將軍旌麾幾曾到

知足篇戲效樂天

我生幸爲男魚米况鄉俗恬然熙洽餘蹤跡混樵牧父
母教我書早已竊君祿優游翰墨林職業少拘束退朝
時閉門爐茗清可掬有書讀幾章有紙揮幾幅有酒飲
幾杯有詞歌幾曲客來或棊枰家居祇常服且有鄰下
兒家聲亦能續俯仰天地間我意無不足敢云求大官
朱軒映華屋福過灾恐生撫已覺顏忸吳江舊遺田聊
以具饘粥爲賦歸去來奚俟詹尹卜

節後見菊

重陽已過十餘日纔見疎籬菊有花厭逐紛華供俗眼
獨留冷淡伴詩家清霜數朶水邊淨落日一枝風外斜
爲汝秋深慰蕭索酒酣聊取插烏紗

慶陽李夢陽獻吉

弘治癸丑進士授戶部主事轉員外應詔彈壽
寧侯張鶴齡繫獄旋釋進郎中代尚書艸奏劾
劉瑾坐黨致仕起江西提學副使

河之水歌

二章

河之水流濺濺望父不見立河干

河水澆澆舟子搖櫓東方漸明我不得渡

鴈門太守行

鴈門太守汝何人治邦三月稱明神我有牛羊賊不來

掠我有黍禾人不敢割昔我無衣今有袴著我思禮拜
太守太守不見憐但聞太守身姓邊紫髯廣額聳兩顴
太守出門四牡駢駢後擁阜蓋前導兩麾行者盡辟易
居者不敢窺旁問太守何所之云訪城南皇甫規

史烈女

梨花如雪霜鴛鴦不成雙我心明如鏡我心清如水鏡
明有塵時水覆無收理古昔華山畿行人下馬拜春風
兩蛺蝶綠草搖衣帶

內教場歌

雕弓豹韃騎白馬大明門前馬不下徑入內伐鼓大同
邪宣府邪將軍者許邪一解武臣不習武奈彼四夷西內

樹旗皇介夜馳鳴礮烈火嗟嗟辛苦

一解

述憤二首

小草生枯桑芊芊競芳辰雖云殊本根寄託各有因自
我罹幽囚忽焉經浹旬我兄千里餘渺渺長河津妻子
日望予蒼蒼隔西鄰所幸二三友笑言越昏晨宵燈促
燕鄰昵語忘苦辛患難苟相得毋論骨肉親

明月出東方徒行反家室室人走相訊問我何由出明
知非夢寐欲辯仍自失喜極雙涕零轉面各銜恤垂燈
照緜卷浮埃滿朱瑟愁言卒未傾忽復見晨日

土兵行

豫章城樓飢啄烏黃狐跳踉追赤狐北風北來江怒湧

卷二
土兵攫人人叫呼城外之民徙城內塵埃不見章江塗
花羣蠻奴逐婦女白奪釵環換酒沽父老向前語蠻奴
慎勿橫行王法誅華林桃源諸賊徒金帛子女山不如
汝能破之惟汝欲犒賞有酒牛羊豬大者陞官佩綬趨
蠻奴怒言萬里入爾都爾生我生屠我屠勁弓毒矢莫
敢何意氣似欲無彭湖彭湖翩翩飄白旗輕舸蔽水陸
走車黃雲卷地春草死烈火誰分瓦與珠寒厓日月豈
盡照大邦鬼魅難久居天下有道四夷守此輩可使亦
可虞何況土官妻妾俱美酒大肉吹笙竽

送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵湖明
公昔時此堂居麋鹿熊豕當窗趨洞庭日落風浪湧倒
影射堂堂欲動慘澹誰聞紫芝曲獨善不救蒼生哭先
帝親裁五色詔老臣曾受三朝祿此時邊徼多戰聲曳
履謁帝登承明謝安笑却淮淝敵魏相坐測單于兵九
重移榻數召見夾城日高未下殿英謀密語人不知左
右微聞至尊羨自從龍去不可攀公亦卧病思東山湘
娥含笑倚竹立山鬼窈窕堂之側上書苦死只欲歸聖
旨優容意悽惻內府盤螭縷金織賜出傾朝皆動色白
金之鋌紅票記寶鈔生硬鴉翎黑崇文城門水雲白是
日觀者塗路塞城中冠蓋盡追送塵埃不見長安陌人
生富貴豈有極男兒要在能死國不爾抽身早亦得君

不見漢二疏千載想慕傳畫圖卽如草堂何處無祿食
覘竊胡爲乎乃知我公眞丈夫嗚呼乃知我公眞丈夫

林良畫兩角鷹歌

百餘年來畫禽鳥後有呂紀前邊昭二子工似不工意
吮筆決皆分毫毛林良寫鳥祇用墨開縑半埽風雲黑
水禽陸禽各臻妙挂出滿堂皆動色空山古林江怒濤
兩鷹突出霜厓高整骨刷羽意勢動四壁六月生秋颺
一鷹下視睛不轉已知兩眼無秋毫一鷹掉頸復欲下
漸覺颯颯開風毛匹綃雖慘澹殺氣不可滅戴角森森
爪拳鐵迴如愁胡皆欲裂朔雲吹沙秋草黃安得臂爾
騎駟馘草間妖鳥盡擊死萬里晴空灑毛血我聞宋徽

宗亦善貌此鷹後來失天子餓死五國城乃知圖寫小
人藝工意工似皆虛名校獵馳騁亦末事外作禽荒古
有經今皇恭默罷游燕講經日御文華殿南海西湖馳
道荒獵師虞長俱貧賤呂紀白首金爐邊日暮還家無
酒錢從來上智不貴物淫巧豈敢陳王前良乎良乎寧
使爾畫不直錢無令後世好畫兼好咬

野泊

遠電明江夜官舟野泊稀山鐘天外落林火雨中微水
立黃龍鬪沙露白鷺飢平生萬里志可奈夢西歸

送陳左使赴貴州

萬里洞庭西秋風入五溪瘴天開斧鉞山驛斷虹霓水

出牂牁繞城臨井宿低堂間花樹紫簫鼓閱雕題

下吏

弘治辛酉年坐榆河驛倉糧乙丑年坐劾壽寧侯正德戊辰年坐劾劉瑾等封事

十年三下吏此度更沾衣梁獄書難上秦庭哭未歸圍牆花自發鎖館燕還飛况屬炎蒸地憂來不可揮

小雀

黃口青條上翩翩索哺頻解飛猶趁母真性不疑人列鼎肴俎待空城彈射巡野田禾黍遍何處不宜身

鵲

簷際翩翩鳥將雛喙喙行攪眠真懊惱傳喜不分明化

印何年就填河幾日平徒然盛生意羣噪每能晴

謁陵

本朝陵墓傍居庸聞說先皇駐六龍一自玉輿回朔漠遂令金殿鎖秋峰明裡袞職雖多預備物祠官豈盡供報祀獨知今上切每於霜露見愁容

秋懷

慶陽亦是先王地城對東山不窟墳白豹寨頭惟皎月野狐川北盡黃雲天清障塞收禾黍日落溪山散馬羣回首可憐鼙鼓急幾時重起霍將軍

大同宣府羽書同莫道居庸設險功安得昔時白馬將橫行早破黑山戎書生誤國空談裏祿食驚心旅病中

女直外連憂不細急將兵馬備遼東
熊監察至自河西喜而有贈

當年五郡乘輅過此日千城攬轡遊封事幾騰天北極
籌邊真歷海西頭崑崙壯壓胡塵斷弱水清翻漢月流
若使巡行皆汝輩遠夷那係廟堂憂

送毛監察還朝是時狩於楊河

楚生臨水送將歸黎子當筵賦式微天下汝爲真御史
百年吾是舊漁磯沙寒白日蓬科轉風起黃河木葉稀
此去有書應力上太平天子本垂衣

楊白花

寧唱采菱曲休歌楊白花菱生猶有蒂花去落誰家

曉鶯

曉睨夢中迷流鶯碧樹西起來紅日照已度別枝啼

經行塞上

天設居庸百二關祁連更隔萬重山不知誰放呼延入
昨日楊河大戰還

汴中元夕

中山孺子倚新妝鄭女燕姬各擅場齊唱憲王新樂府
金梁橋上月如霜

贈陳氏

萬龍岡上古農家男樂耕耘女績麻客到大開萱艸閣
春風時動紫荊花

雲中曲

黑帽健兒黃貉裘匹馬追胡紫塞頭相逢不肯通名姓
但稱家住古雲洲

白登山寒低朔雲野馬黃羊各一羣冒頓曾圍漢天子
胡兒惟說李將軍

萬安劉玉咸栗

弘治丙辰進士知輝縣入御史歷江防至刑部

左侍郎卒

百舌

百舌鳥何佻巧啼遍上林音裊裊雌鳩喚雨雄喚晴鷓
鴒欲住鶻欲行一鳥一舌尚難定爾有百舌能無爭人

生言出慮禍入一言之失駟不及三寸舌在中禍機啗
爾百舌無是非

婺源戴銑寶之

弘治丙辰進士官南給事以論劉瑾削籍

經古鄭州

城勢尚蜿蜒風光異昔年民垣官舍瓦兔穴戰場田古
樹無秋色殘碑有暮煙興衰亦常理臨眺却淒然

歷城邊貢廷實

弘治丙辰進士授太常博士累官南戶部尚書

答石峰見懷

斗柄當西南河漢東北傾零零露華白晶晶天宇晴微

風度廣陰熠燿時復明卉木日已黃秋氣日已清念子
理瑤瑟苦調多離聲嗷嗷失侶鴈泛泛隨波萍會合固
有期此日難爲情

運夫謠送方文玉督運

運船戶來何暮江上旱風多春濤不可渡裏河有閘外
有灘斷篙折纜腰環環夜防鼠日防漏糧冊分明算升
斗官家但恨倉廩貧不知淮南人食人官家但知征戍
苦力盡誰憐運船戶運船戶爾勿哀司農使者天邊來
贈別甯子

白日就長道清秋凌大河非關燕趙別相送一悲歌

西園二首

朝看長白山暮看長白山山色有朝暮吾心常自閒
庭際何所有有萱復有芋自聞秋雨聲不種芭蕉樹
鄆縣王九思敬夫

弘治丙辰進士選庶吉士調吏部主事陞郎中
坐劉瑾黨降壽州同知尋勒致仕

對酒憶康五

林棲鮮儔侶芳醕聊獨親繁香媚晴景嘉賓及茲辰習
習谷風發萋萋卉木春黃鳥鳴枝間翩翩求其羣對此
豈不樂念彼同心人室遠心徒勞追趨靡所因安得驟
雲霓頃刻馳見君

月夜與李獻吉飲

萬尸秋風礎杵哀殊鄉今夕故人來竹間涼露蕭蕭下
樓上浮煙細細迴地僻柴門無過客家貧樽酒有餘醅
疎簾碧簟須同醉明月青天爲爾開

金陵顧璘華玉

弘治丙辰進士由縣遷府降州再起府累官巡
撫江西乞終養忤旨勒致仕再起巡撫湖廣顯
陵工竣加工部尚書還朝

南巖雷神祠

雷神棲何所巖洞深杳冥幽林蔽日影寒澗餘龍腥經
年尚留雪當午仍見星石奇出變相境勝通神靈譎怪
山海事流傳信前經

度楓木嶺

初謂山拂天飛鳥不可度逡巡躡危磴乃卽我行路百
折頻攀援十步九回顧高林忽在下衣襟有雲霧倒景
猶照人平地黯將暮東北望故鄉江流莽傾注長風動
萬里獨立難久竚

東郊田園

陶公歸桑里謝客營石門於世旣無競努力事田園春
還理荒穢良苗應時繁豈不念歲豐天道難預論列槿
藩草屋藝蔬備晨餐郊居漸成趣益厭城市喧菽水苟
無闕萬事奚足言

辨蛤和涇川公

漁海窮溘汰獵山歷哈呀生人胡多勞養此六六牙聖
哲著禮經細不遺螳蛙食黿一染指因以傾厥家末俗
貴珍異載籍紛喧譁美哉爾石蛤奚免網與叉修脰雪
長苻腴中剖團瓜烹以實下豆亦慰賓筵嘉南方盛蟲
族大者蛇與蟄瑣細及百種射影兼含沙食者苦漚泄
傷者困瘡痍例舉混美惡頗笑昌黎差幸蒙匕箸賞重
以褒辭加河豚自此賤况復論魚鰕

庚辰元日

諸侯玉帛會長安天子旌旗下楚關共想元正趨紫殿
翻勞邊將從金鞍滄江飲馬波先靜黃竹回鑾雪未乾
北極巍巍天咫尺五雲長護鳳樓寒

寄張司馬九月六日憶湘山寺舊遊

遙憶東山張太傅去年今日共離觴清江畫舫愁中別
落月楓林夢裏長黃菊再逢非舊日白頭相見定何鄉
題詩欲寄衡陽去目斷西風旅雁行

懊惱曲效齊梁體

小時聞長沙說在天盡處人言見郎船已過長沙去
雨中溪行雜詩

十日溪中舟格格響溪石孤蓬過鳴雨忽失沙上脊

吳縣唐寅伯虎

弘治戊午解元坐事下獄放歸

賣畫二首

卷二
領解皇都第一名披猖歸卧舊茅衡立錐莫笑無餘地
萬里江山筆下生

青衫白髮老痴頑筆硯生涯苦食難湖上水田人不要
誰來買我畫中山

餘姚王守仁伯安

弘治己未進士授刑部主事改兵部坐救戴銑
忤劉瑾杖謫貴州龍場驛丞旋起復歷郎中拜
僉都巡撫南贛平宸濠歸匿山中復起征苗卒
嘉靖初追封新建伯

別湛甘泉

行子朝欲發驅車不得留驅車下長坂顧見城東樓遠

別情已慘况此艱難秋分手訣河梁涕下不可收車行
望漸杳飛埃超層丘遲回岐路側孰知我心憂

興隆衛書壁

山城高下見樓臺野戍參差暮角催貴竹路從峰頂入
夜郎人自日邊來鶯花夾道驚春老雉堞連雲向晚開
尺素屢題還屢擲衡南那有鴈飛回

龍潭夜坐

何處花香入夜清石林茅屋隔溪聲幽人月出每孤往
棲鳥山空時一鳴草露不辭芒屨濕松風偏與葛衣輕
臨流欲寫猗蘭意江北江南無限情

武功康海德涵

卷二
弘治壬戌狀元授修撰尋以救李夢陽坐黨劉
瑾落職

許西別業同承裕升之作

還畊愜初願揖世返空林雖非志士理已獲靜者心嘉
賓青雲客枉駕忽相臨攜酒共斟酌張絃揚妙音義厚
情自叶道合契滋深漪漪漳川水幽幽南山岑相值不
相樂奈此逝者侵

觀禾

我來彭麓下坐愛青山色雨過忽新涼蒼煙望無極秋
禾行欲成豈畏驕陽逼壠畝綠如屯原隰少螟賊同欣
有年樂詎知天子力

對客

絲竹憐吾嬾尊罍待汝來片雲霄漢沒叢菊小籬開積
雨難相過當歌莫謾迴請看秋艸色黃滿建章臺

西海子

寺下煙波春不開苑中風浪隱樓臺泉源細繞西山出
雲氣深從北極來萬里乘查觀日月十年登閣望蓬萊
黃塵碧水須臾事莫使魚龍夜夜哀

信陽何景明仲默

弘治壬戌進士授中書轉吏部員外出為陝西
提學副使

短歌行

冉冉秋序肅肅霜露蓄我旨酒召我親故烏歡同林水
歡同源矧我同鄉胡能弗敦耀靈西藏明燈在室更長
夜良可以繼日園有藝菊庭有樹蘭秋芳是悅春榮曷
觀高陵可升海水可測出門異路安知南北生年幾何
去者日多子不我樂聽我短歌

梁甫吟

君不見泰山高高梁甫在其半古來封壇禪地無宮館
厓崩壁圻鐵鎖斷秦碑漢碣何人看自從生人開九州
九十六帝行權謀虎豹啖食龍蛇憂朝翻暮覆作雲雨
立談坐笑生戈矛君不見田疆論功爭二桃齊門三丘
藐野蒿又不見魯連辭賞輕千金却秦救趙何雄豪眼

前無人辨曲直身後聲名更何益拂袖空憐蹈海心護
車枉費排山力梁生五噫歌莫哀東絕梁甫觀蓬萊千
年雲開錦繡壁五色日抱金銀臺瀛洲方丈列仙占文
成五利何能驗徐生入島竟不回博士儒生盡坑塹我
吟梁甫君振衣世路崎嶇多是非琅玕芝艸海岱曲釣
竿拄杖從今歸

擣衣

涼飈吹閨闈夕露淒錦衾言念無衣客歲暮方寒侵皓
腕約長袖雅步飾鳴金寒機裂霜素繁杵叩清砧哀音
緣雲發斷響隨風沉顧影惜流月仰盼悲橫參路長魂
屢徂夜久力不任君子萬里身賤妾萬里心燈前擇妙

卷二
匹運思一何深裁以金剪刀縫以素絲鍼願爲合歡帶
得傍君衣襟

擬古

名都有高樓上入青雲端修城延曲隅阿閣交重闌佳
人理清曲當戶橫朱絃揚音彩霞裏令顏誰不歡賓客
會四座絲竹哀且繁日中車馬至薄暮皆來還聽曲各
言好知音良獨難

行路難

牀有織綺篋有織素請君視綺還視素憐新不如莫棄
故樽中有酒盤有餐聽我爲歌行路難衆中歡樂多志
氣豈知他人不得意白日有時不照地安得保君常不

棄

車遙遙

寒雞喔喔知夜半鄰翁春梁婦炊飯僕夫聞雞趣車起
欲明未明行十里火輪飛出扶桑霞羲和騎龍鞭日車
君看日亦無閒時我車安得常在家

官倉行

長棘周袤三丈垣高門鐵鎖緘西關黃鬚碧衫下廩吏
白板朱書十行字帳前喧呼朝不休翦旌分隊聽唱籌
富家得粟堆如丘大車檻檻服兩牛鄉間餓夫立牆下
稍欲近前遭吏打

古井篇

君不見城邊古井荆棘荒沙崩雨塌官道傍當時碧甃
映朱閣黃金闌干銀作床美人銅瓶響哀玉寧知委棄
同悲涼梧桐花乾蘚花濕鷺鷥側窺蚯蚓入百丈寒泉
尚堪飲心長綆短空愁立

偏橋行

城頭日出一丈五偏橋長官來擊鼓山南野苗聚如雨
三尺竹箭七尺弩朝出射人夜射虎男解蠻歌女解舞
殺血祈神暗乞蠱沙蒸水毒草根苦上山下山那敢杜
蠢爾苗民爾毋侮虞庭兩階列干羽

寄空同子卜居襄陽

爾定襄陽宅雲山好傍誰草憐王粲井花醉習家池留
滯悲江漢驅馳感歲時扁舟空悵望未有鹿門期

皇陵

陵闕皇靈閔山河王氣遙萬年龍虎抱每夜鬼神朝玉
盃留天地金燈照寂寥如看翠華度縹緲在青霄

大功德寺

寶地煙霞上珠林霄漢間宣皇留殿宇今日共追攀御
榻臨丹壑行宮鎖碧山帝城看不遠時見五雲還

玉泉

行遊金口寺坐愛玉泉名雲去隨龍女風來動石鯨入
宮朝太液穿苑象昆明却望天河水迢迢萬古情

武關

北轉趨劉壩西盤出武關微茫一線路迴合萬重山天
地幾龍戰風雲惟鳥還關門鎖溪水日夜送潺湲

昭烈廟

漂泊依劉計間關入蜀身中原無社稷亂世有君臣峽
路元通楚岷江不向秦空山一祠宇寂寞翠華春

送雷長史

彤管先朝隨帝子白頭今日奉王孫漢庭亦羨相如美
楚客重看賈傅尊花下圖書開玉殿日高琴瑟在朱門
十年亭閣淮西宴腸斷梁王雪夜樽

送施聘之侍御

海甸春風攬轡情燕關驄馬去還鳴繡衣霄漢花間出
錦纜江湖樹裏行近日西臺多諫草少年南國有詩名
別絃更憶風流調愁聽東城二月鶯

諸將入朝

大將龍旗朝帝京至尊親遣貴臣迎侍中獨領嫖姚部
戰馬皆歸龍虎營

闕下千官侍鳳樓苑中天子建龍旂豹房虎圈先班賞

武帳前邊賜姓侯

指江彬
錢寧等

送韓汝慶還關中

華岳雲臺萬里情高秋落日眺秦城黃河一線通滄海
身在仙人掌上行

長洲朱袞子文

卷二
弘治壬戌進士官監察御史

同憲部吳靜之乃弟黃門瞻之遊虎丘時正德戊

寅夏仲

作寺貴得地虎丘天下名客來林鳥悅當暑鳴嚶嚶履
石信所擬登閣殊增明閒雲漫千頃目曠樹杪平不見
闔閭墓池水號劒精至今斗牛間白氣中夜橫

儀封王廷相子衡

弘治壬戌進士選庶吉士改兵科給事中以言
事謫判亳州尋拜御史巡按陝西被誣再謫再
遷歷官至兵部尚書提督團營加太保卒

蘄民謠 三首

有芄者艾生我土七年之病得者愈五內失調邪作主
富貴耽慾乃自取艾縱有靈將奚補我欲言之上官怒
龍鬚作席光電電暑眠不及蘄陽簟涼如水滑如藤一
簟幾工能織成官府取之只一聲有價無價誰敢爭
龜鬚生毛絲的的大如錢貴如璧養來盆中水凝碧細
人之玩有何益

赭袍將軍謠

萬壽山前擂大鼓赭袍將軍號威武三邊健兒猛如虎
左提戈右跨弩外庭言之赭袍怒牙旗閃閃軍門開紫
茸罩甲如雲排大同來宣府來

宮怨

夜輦昭陽月春筵上苑花不成供奉日枉自學琵琶

巴人竹枝

楊花作雪草連天郎下荆吳又一年江上浣紗郎不見
問郎錯問下江船

金陵歌

山到金陵龍虎分大江環抱日生雲千年宮闕存遺事
猶有都人說建文

長興顧應祥惟賢

弘治乙丑進士累官南刑部尚書

倭寇

高皇啓天運龍飛當九五萬國盡來王惟詔絕倭虜惡

其性狡猾外服心跋扈所以備之嚴兵防遍斥鹵後雖
容入貢來往亦有數奈何海濱氓趨利者蠡午自決中
夏防勾引島夷部偵知我虛實公然肆侵侮攻城殺官
吏燎原損稔黍剽掠辱閨闈屠僇及乳哺結巢據險要
呼類益屯聚承平紉綺習詎識干戈苦聞風輒先奔墮
塹等盲瞽去年樵李敗慘極不忍觀浮骸滿溝渠行不
通商旅堂堂會城中三司列文武長驅且深入無人敢
撐拄坐令北關外一炬成焦土脅從半吾民如以翼加
虎元帥乃書生市兒充行伍縱有百萬家竟不能殼弩
見說賊兵來城門已先杜十室九逃竄止遺甃與釜算
緡科兵田招兵沿門戶東南財賦區中病在肺腑天子

怒按劔新命改督府彼倭干天憲凶殘久自沮會見一
埽平四方盡安堵

信陽孟洋望之

弘治乙丑進士以行人選御史論張桂下獄謫
桂林旋起歷僉都巡撫寧夏改河道終大理卿

登岳陽樓

此地昔曾過危樓今始攀日銜天際樹雲動水中山津
驛趨三楚江關控八蠻亂帆何處去風浪未知還

毛侍御汝厲按湖南道出嘉魚賦別

黃鶴游仙地青驄漢使過雲開衡嶽色春入洞庭波陵
谷招秦隱江湘續楚歌平生經濟術今日定如何

壽張殷雲霄近夫

弘治乙丑進士知靖江縣調青田陞南工科給

事中

長店

大風揚塵沙白日昏林丘前途浩莫辨聊此停吾舟崇
岡蹲狐狸高樹鳴鸚鵡我欲驅之去惜哉無弓矛鸞虞
嗟已矣此輩今何求

虎丘寺

落日青山外浮雲滄海邊江山皆勝迹樓閣自人天碧
草生公塢丹厓陸羽泉平生獨往志欲老翠微顛
太倉徐禎卿昌穀

卷二
弘治乙丑進士授大理寺副降國子博士卒年
止三十有三

白紵歌

三星爍爍花滿堂素腕盈盈出洞房垂羅映縠耀明妝
噉若雲中開月光流情盼君君莫忘停歌節舞進玉觴
願君安坐夜未央

雜謠

夫爲虜妻爲囚少婦出門走道逢耶孃不敢收東市街
西市街黃符下使者來狗鯁鯁雞鳴飛上屋風吹門前
草肅肅

倡家詠效何遜

簾櫳秋未晚花霧夕偏佳暗牖通新燭虛堂響落釵浙
浙烏棲樹明明月墮懷相思不可見蘭生故繞階

送范靜之遷威州

吾憐范巨卿悃悞不邀名作吏竹林下清風訟獄平與
君同得罪獨竄夜郎城萬里巴江水相思猿狄鳴

送熊士選侍御

壯士樂長征門前邊馬鳴春風三月柳吹暗大同城蘆
溝橋下東流水故人一樽情未已遙天飛盡隴頭雲唯
見居庸暮山紫羨君鞍馬速流星子亦孤帆下洞庭塞
北荆南心萬里佩刀長揖向都亭

寄顧華玉

去歲君爲薊門客燕山雪暗秦雲白馬上相逢脫紫貂
朝回沽酒城南陌燕山此日雪紛紛祇見秦雲不見君
胡天白鴈南飛盡千里相思那得聞

青門歌送吳郎

吳郎醉嗜長安酒落魄自言爲客久走馬頻看上苑花
回鞭幾折青門柳青門曈曈魚鑰開乳燕游絲相逐來
柳下雕鞍留別袂花間酒殘覆蒼苔浮雲去去辭城闕
芳草連天那可歇野店春風聽早鶯關河曉樹懸新月
千里淮流雙畫橈廣陵驛前逢暮潮落日帆歸揚子渡
青山家對伯通橋吾家流水原非隔宛轉胥臺通巷陌
艸長難尋仲蔚居林深不辨陶潛宅清溪屋下可垂綸

復有萼羹足獻親君歸儻食冰絲鱠爲念羈棲塞北人

彭蠡

茫茫彭蠡口隱隱鄱陽岑地涌三辰動江連九派深揚
舩武昌客興發豫章吟不見垂綸叟煙波空我心

在武昌作

洞庭木葉下瀟湘秋思生高齋今夜雨獨卧武昌城重
以桑梓念淒其江漢情不知天外鴈何事樂南征

送友人還吳

陽月隨陽鴈遙從塞上來北人江北望不見隴頭梅坐
下楊朱淚吟爲莊鳥哀聊傳數行札千里送君回

嘉禾道中

卷二
橋李城何在蕭條艸樹存未醒吳苑酒已動越鄉魂問
水來天目看桑過石門愁聞鶻鴒語寧聽楚山猿

月

故園今夜月迢遞向人明只自懸清漢那知隔鳳城氣
兼風露發光逼曙烏驚何事江山外能催白髮生

贈別獻吉

爾放金雞別帝鄉何如李白在潯陽日暮經過燕市客
解裘同醉酒壚傍徘徊桂樹涼飈發仰視明河秋夜長
此去梁園逢雨雪知予遙度赤城梁

送盛斯徵赴長沙

昔愁越雋千峰仄轉入巴渝萬里賒豈料聖恩憐賈誼

猶煩佐郡出長沙蠻中瘴遠三湘水江畔春逢十月花
遙聽岳陽樓上笛可能回首憶京華

送蕭少府

矯矯雙鳧塞隴分武夷殘雪半春雲玉洞只愁仙隱去
洛陽花下不逢君

送方山人

巖子灘頭花落時水清雲碧淨漣漪孤舟相逐飛花去
一日看山到武夷

閩縣鄭善夫繼之

弘治乙丑進士除戶部主事改禮部以諫南巡
杖闕下尋乞歸薦起南吏部郎中

聞道

聞道今天子身封鎮國公家初營上谷臣得賀離宮鐵
券傳何急將軍氣盡雄郊牛凡五卜車駕想河東

早秋龍門舟中

盤子小於葉早秋江上行風波千古撼天地幾時平病
骨憐滄海凡才恥聖明不眠聞短吹故國亦飄零

送陳生赴韶州戎幕

月下棲烏樹天邊過鴈羣生涯隨逆旅幽獨倍憐君百
粵茲多難今時未尚文南遊得蠻府愁殺郝參軍

蘭溪唐龍虞佐

正德戊辰進士嘉靖中累官吏部尚書

赦書坪渡渭

渭北津多柳荒荒野色連十家橋外市雙櫓峽中船冰
響潛魚聽沙明過鳥憐蹉跎歸色晚風雪又殘年

成縣馬融絳帳臺

太守傳經地幃輿趁月行栗亭秋雨歇魚峽夜川明竹
外雙旌出沙邊一吏迎荒臺迷絳帳失學媿諸生

褒城

地勢雄臨漢風聲遠接巴霧深城市隱日照谷門斜鳥
道懸青壁龍江走黑沙未觀諸葛壘先問子真家

子午嶺

嶺名分子午天險限西東劔閣千人廢吳山一箭雄雲

封關樹黑日出塞門紅遠道悲遊子驅車背朔風

臨洮

荒郡人煙少頻年胡騎多風雲屯浩疊雨雪漲黃河何處來天馬誰人制駱駝紛紛增感慨此後更如何

朝邑韓邦靖汝慶

正德戊辰進士除工部主事歷員外乾清宮災應詔陳言繫錦衣獄奪官爲民起山西左叅議

聞鴈

鳴鴈蕭蕭下寒燈故故明角聲傳細雨雲色度高城兄弟無書信乾坤有甲兵秋風歸未得見爾不勝情

答楊侍御

逐客地雖僻故人情不疎已勞千里駕復覩數行書別思梅花後春風蕙艸初江亭一杯酒何日話相於

西巡歌

渥洼龍馬屬天閑沙苑牛羊入大官八府三邊俱望幸九重十月未回鑾

關中胡纘宗孝思

正德戊辰進士授檢討外補嘉定州判移潼川遷南戶部郎中改吏部出安慶府調蘇州歷副都巡撫山東改河道駕幸楚纘宗作詩紀事爲戶部主事王聯所訐逮獄尋放歸

擬古

驚喜君王至西華夜啓扉後車三十乘載得美人歸

指樂

戶劉良女居騰禧殿號夫人然夫人在途多諫獵非專以色固寵者

新都楊慎用修

正德辛未狀元授修撰以議大禮杖謫永昌終

三岔驛

三岔驛十字路北去南來幾朝暮朝見揚揚擁蓋來暮看寂寂回車去今古銷沉名利中短亭流水長亭樹

賦得千山紅樹圖送楊茂之

蕭郎雅工金碧畫愛畫碧雞與金馬畫作千山紅樹圖行色秋光兩瀟灑搖落深知宋玉悲登山臨水送將歸丹林初曉清霜重紫谷斜陽赤燒微故人辭我故鄉去

滇樹遥遥接巴樹桑落他山共醉時楓香客路銷魂處白首遐荒老未還流波落木慘離顏錦城紅樹那能見千里隨君夢裏攀

春興

最高樓上俯晴川萬里登臨絕塞邊碣石東浮三絳色秀峰西合點蒼煙天涯游子懸雙淚海畔孤臣謫九年虛擬短衣隨李廣漢家無事勒燕然

懷歸

星橋南望沉犀渚雪嶺西連抱洱河關塞渺茫魂夢隔山川迢遞別離多汀洲春雨塞芳杜茅屋秋風帶女蘿心事未從詹尹卜生涯聊聽棘童歌

題武侯祠壁

劔江春水綠沄沄五丈原頭日又曛
舊業未能歸後主大星先已落前軍
南陽祠宇空秋草西蜀關山隔暮雲
正統不慙傳萬古莫將成敗論三分

夔州竹枝詞

夔州府城白帝西家家樓閣層層梯
雨雪下來不到地春水生時與樹齊

滇海竹枝詞

東浦彩虹懸水樁西山白雨點寒江
煙中艇子搖兩槳空裏鷺鷥飛一雙

自注滇人喚虹霓為水樁

沁水常倫明卿

正德辛未進士除大理評事謫壽州判遷知寧

羌州

望山有懷故居

羈步局重城流觀狹四野高高見西山
鄉愁冀傾寫天際望不極延佇一瀟灑
落葉歸故根山雲滿秋櫓無情尚有適
何以慰離者

和王玉溪過韓信嶺

漢代推英武將軍第一人禍奇因躡足
功大不謀身帶礪山河舊丹青祠廟新
長陵一坏土寂寞亦三秦

竹

庭竹娟娟色虛堂肅晚陰翠交紅果潤
清陰碧苔深涼

月侵冰簟流風送玉琴歲寒終不改長此護霜林

涿州頓銳

正德辛未進士官戶部主事

樓桑廟迎送神曲

二首

帝子降兮范之陽恍臨睨兮舊鄉山蒼蒼兮水泱泱神
之來兮驂駟虬玉鸞鳴兮啾啾雲車兮羽蓋樓桑陰兮
蔽芾牲既肥兮酒香總帷施兮雕玉牀荃高坐兮樂未
央

帝子去兮安之違桑梓兮心孔悲白帝城兮永安宮魚
之腹兮蠶叢巫陽雲雨兮洞庭波雖信美而非吾土兮
矧蛟鰐與鼃鼃歸來兮歸來其樂兮如何

銅雀妓

西陵芳草合松柏半爲薪宮殿飛銅雀下飲漳河濱檀
煙冷餘燼總帳網流塵白頭歌舞妓來教晉宮人

觀鬪蟋蟀

蟋蟀著幽風泉壤恒食息迎陰已振羽欲鳴先鼓翼候
氣感化機吟秋率其職於世無所爭豈有剛膂力都緣
助人意自負萬夫特見敵豎兩股怒鬚如卓棘昂藏忿
塞胸彭亨氣填臆將搏必踞蹲思奮肆陵逼既却還直
前已困未甘踣雄心期決勝壯志冀必克依稀觸與蠻
蝸角並開國人生亦類斯駒隙競失得知雄守其雌老
氏有淵識

儀真蔣山卿子雲

正德甲戌進士授工部主事諫南巡廷杖謫南
都事起刑部郎中陞廣西叅政

田園卽事

東菑耘事畢老翁自閒閒鼓腹何所知徘徊墟落間斜
日上高原一望江南山寒林玩柔荑涉澗弄潺湲欣然
適其適日黑始來還了無一可說呼兒掩柴關

春夜偁叅戎見過

蒼梧春欲暮旅况復何如上客煩驃騎中厨具鯉魚流
雲城樹暗過雨徑花疎相過休言數高談賴起余
八月十五夜懷京中舊遊

今夕那無月他鄉獨上樓兵戈添白髮幕府滯清秋對
酒傷前事尋詩數舊遊呼童把官燭漏盡不能休

亳州薛蕙君采

正德甲戌進士授刑部主事改吏部歷郎中以
議大禮詔獄尋復職未幾罷歸屢薦不出

詠懷

朝登古臺上遙望大河陰朱明來自南隆暑倏已臨丹
霞曜陽景渥露霑玄林颺風振曾柯鳴蟬響哀音四時
代終始變化迭相尋盛長固殊昔遲暮方在今感物切
悲情愴歎傷我心

生才良不幸處世誠獨難揚蛾與妒階懷璧賈罪端靈

均既見放韓非亦自殘奉身失所從慷慨使我歎

贈孟望之

踟躕郊野外白日匿西山行人去有期安得久周旋請
爲游子吟與子結纏綿憂來動人心惻愴不能言言念
平生友意氣非徒然行役不足辭貧賤非所憐君其篤
明信慰我心拳拳

月夜

明月三五時流光千里外虛館風泠泠寒墀霜靄靄不
見南樓客徒憶西園蓋懽酒無盈觴憂襟不餘帶沉吟
靜夜思緬邈佳人會

七月十五夜對月

嫋嫋涼風夕紛紛零露時秋來看明月風露已如斯况
對西園酌兼懷康樂詩山中有桂樹今夜足相思

重游蕭氏園

別此真如昨重游換物華粉滋曾倚竹紅淺舊看花沙
阪紫林曲山籬逐水斜城南咫尺路未覺往來賒

負郭

負郭茅堂小臨溪竹圃斜山樽移野客魚網晒鄰家荒
徑封殘雪疎籬透晚霞預思春到日著處種桃花

邨居

寂寞邨居僻荒蕪草徑深飛蓬來曠野啄木響空林薄
暮聊凝望清江正苦吟此生甘落魄自笑果何心

寒食對雨遣悶

一百五日春已深閉門風雨晝陰陰乍飛燕子濕無那
欲折桃花嬌不禁歸去久淹滄海興愁來端擬白頭吟
天涯節序堪愁思更遣蕭條斷客心

贈繼之

長安城中不可留風塵日日使人愁上書解綬我將去
拔劍出門君且休五岳登臨幾兩屐三江來往一扁舟
東西南北好行樂與爾相隨萬里遊

涼州詞

隴西西去抵涼州邊塞蕭條處處愁青艸不生青海曲
黑雲常聚黑山頭

行幸南京歌

二首

翩翩翠蓋覆鳴鑾詔許都人夾道看樂府盡歌楊柳曲
後車多著鷓鴣冠
燕姬玉袖抱箜篌馬上長隨翠輦游春來影照秦淮水
愛殺江南雲母舟

春日漫興

二月黃鸝滿樹飛歌喉宛轉世間稀謝公雖有東山妓
不及儂家金縷衣

進賢舒芬國裳

正德丁丑狀元授修撰以諫南巡受杖謫福建
鹽課司提舉嘉靖初以議大禮再杖歸卒

東流遇雨

歲晏東流縣江雲黯寂寥雨滋帆葉重風急浪花飄鴻
鴈飛何遠蛟龍舞更驕客懷何處遣隔岸酒旗招

貴溪夏

公謹

正德丁丑進士授行人嘉靖中累官華蓋殿大
學士上柱國太師後棄市

安鄉道中觀婦人插田

南邨北邨競栽禾新婦小姑兼阿婆青羣束腰白裹首
手擲青秧如擲梭打鼓不停歌不息似比男兒更膂力
自古男耕女專織憐爾一身勤兩役吁嗟乎長安多少
閨中人十指不動金滿身

夜泊吳江

月岸秋燈滅風湖夕浪翻橋連楓樹冷城帶水雲昏把
燭延津吏停舟次驛門漁歌起何處瀟灑數家邨

漢川道中

晚市浮煙斂春洲曲水連遙燈林表亂圓月浪中偏犬
吠經邨店蛙鳴逼稻田夜行三十里野興得蕭然

次薛西原

背郭茅齋僻沿堤竹徑斜藜逢野客酌酒共山家暖
日熏芳草寒流漾淺沙江邨二三月歲歲足鶯花

扈駕承天謁陵

馳道回雕輦行宮列羽林青山留王氣白日散春陰一

代朝陵典千官扈蹕心媿非詞賦手虛沐聖恩深

雪夜召詣高玄殿

迎和門外據雕鞍玉竦橋頭度石欄琪樹瓊林春色靜
瑤臺銀闕夜光寒爐香縹緲高玄殿宮燭熒煌太乙壇
白首豈期天上景朱衣仍得雪中看

咸寧許宗魯伯誠

正德丁丑進士選庶吉士改授御史累官大理
少卿以僉都撫保定以副都撫遼東

晚渡黃河

落日西山暗洪河夏漲餘昏黃沉鞏洛浩渺極梁徐鼓
聽臨流驛燈看遠岸漁頻年在行役倚櫂一長吁

西苑

畫閣橫青漢彫臺俯碧流苑雲低度雨宮樹早生秋水
抱芙蓉殿山連翡翠樓何須浮海外卽此見瀛洲

登齊山樓

近郭危樓俯碧湍倦游孤客倚層闌淮淝山色尊前出
吳楚江流畫裏看旅思逢秋增短鬢鄉心隨鴈過長安
黃花白酒登高日玉笛金笳起暮寒

城南游覽

楊柳今無渚芙蓉舊有園請看蒿里地卽是樂游原
蘄縣陳沂魯南

正德丁丑進士由庶吉士累官侍讀學士

經牛頭山寺

落日牛頭寺攀緣嶺七盤鳥聲林葉暗山影石溪寒清
梵空中聽丹樓畫裏看到門僧不見松檜滿秋壇

黃岡王廷陳稚欽

正德丁丑進士選庶吉士改授吏科諫南巡杖

謫裕州尋下獄免歸

擬矯志篇

蛟龍雖困不資凡魚鸞鷲雖孤不匹鷲雛雖有香草當
戶必除雖有仁人在敵必誅狐白雖美炎暑必置舟車
之用易地則棄蘭蕙不采無異蓬蒿干將不試世比鉛
刀以驥捕鼠曾不如狸餓夫獲璧不如得糜郭生純臣
魯連高士彼乃登臺此則蹈水寧直見伐無為曲全寧
渴而死不飲盜泉

放歌行

竊鈎者誅竊國者王仁義資亂道豈不臧一解代秦者呂
襲楚者王巍巍國君大道在傍二解謂尺何短謂寸則長
此不可度彼何可量三解獸殪罟裂鳥盡弓藏智勇既殫
軀乃見殃四解讒巧為忠直夫稱狂出門異趨毀譽曷常
五解樂不可極憂來無方游心沖虛以保壽康六解

詠懷

昔聞有游女逍遙翔碧潯交甫下請佩解贈情亦深可
遇不可持變化愁予心影滅佩亦失漢廣無由尋盼睇

絕髣髴徘徊逮夕陰青鳥忽來過貽我金石音憂思耿
難忘寫意於鳴琴自傷非儔類感激長悲吟

閨情

種木期息陰結交期得心與君初婚時安坐調瑟瑟繫
我大秦珠貽我玳瑁簪攜手同車遊徘徊步春林俯拾
並蒂花仰聽和鳴禽折芳交贈持言誓一何深寧期被
讒妒棄我忽如沉曠歲不一接塵埃生錦衾明月入空
帷中夜坐悲吟發篋理故物淚下誰能禁

駕幸南海子

南郊初禮帝上苑復誇胡虎兕先聲伏車徒翼輦趨網
羅張一面部曲用三驅侍從羣臣在應知諫獵無

春日山居

野曠林爭出花深徑屢迴春風芳草外亂水白雲隈燕
接飛蟲去鶯沾落絮來小堂宜竹護一一荷鉏栽

山莊雜興

老夫諳稼穡次第葺園廬對酒惟田父呼門絕里胥桑
麻經雨後花竹宛秦餘如此生涯足何勞薦子虛

聞箏

花月可憐春房櫳映玉人思繁纖指亂愁劇翠蛾顰授
色歌頻變留賓態轉新曲終仍自敘家世本西秦

燕京元夕曲

香車一一渡星橋翠袖雙雙引玉簫但訝遊人爭辟易

不知夫壻漢嫖姚

清江敖英子發

正德辛巳進士除南刑部主事終河南布政使

塞上曲

二首

軍中頻宴樂醉後擁雕鞍紫塞連天遠黃雲拂地寒羌
兒叱撥馬胡女固姑冠逐隊營門立春風倚笑看
無定河邊水寒聲走白沙受降城上月暮色隱悲笳玉
帳旄頭落金微雁陣斜幾時征戰息壯士盡還家

別業漫興

門對寒江舊不斜旋開三徑學陶家秋來不問登高節
日日攜壺醉菊花

長洲文徵明徵仲

以歲貢入京薦授翰林待詔

飲酒

晚得酒中趣三杯時暢然難忘是花下何物勝樽前世
事有千變人生誰百年唯應騎馬客輸我甕頭眠

新秋

江城秋色淨堪憐翠柳鳴蜩鎖斷煙南國新涼歌白苧
西湖夜雨落紅蓮美人寂寞空愁暮華髮彫零不待年
莫去倚闌添悵望夕陽多在小樓前

致仕出京言懷

白髮蕭疎老秘書倦游零落病相如三年漫索長安米

卷二
一日歸乘下澤車坐對西山朝氣爽夢回東壁夜窗虛
玉蘭堂下秋風早翠竹黃花不負余

題畫

江頭春水綠灣灣江上春山擁翠鬟老我輸他茅屋底
無愁終日對江山

明詩去浮卷二

